

**BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Komisija za sigurnost**

**NACRT**

**ZAKON  
O NABAVLJANJU, DRŽANJU I NOŠENJU ORUŽJA I MUNICIJE**

**Sarajevo, oktobar 2013. godine**

**ZAKON  
O NABAVLJANJU, DRŽANJU I NOŠENJU ORUŽJA I MUNICIJE**

**I. OSNOVNE ODREDBE**

**Član 1.  
(Predmet Zakona)**

Ovim zakonom uređuju se uvjeti za nabavljanje, držanje i nošenje oružja i municije, oduzimanje oružja i municije, promet oružja i municije, način postupanja sa oružjem i municijom, popravlanje i prepravlanje oružja, osnivanje i vođenje civilnih strelišta i evidencije o oružju i municiji u Federaciji Bosne i Hercegovine (u daljnjem tekstu: Federacija), te druga pitanja od značaja za nabavljanje, držanje i nošenje oružja i municije.

**Član 2.  
(Cilj Zakona)**

(1) Ovaj zakon ima za cilj da se na jedinstven način uredi oblast nabavljanja, držanja i nošenja oružja i time stvore uvjeti za zaštitu ljudi i imovine od mogućeg ugrožavanja upotrebom oružja i da se utiče na sprečavanje nelegalnog naoružavanja lica koja se bave organiziranim kriminalom i terorizmom, kao i nelegalnog nabavljanja i držanja oružja od građana i pravnih subjekata.

(2) Donošenje ovog zakona zasniva se na obavezi da se oblast nabavljanja, držanja i nošenja oružja regulira u skladu sa Direktivama Vijeća Evrope na području Federacije i da se na nivou Federacije uspostavi jedinstvena centralna evidencija o oružju i municiji i da se nabavka, nošenje i držanje oružja regulira na jedinstven način i pod istim uvjetima za područje cijele Federacije i time stvore odgovarajući uvjeti za ostvarivanje cilja utvrđenog u stavu (1) ovog člana.

**Član 3.  
(Izuzetak od primjene ovog zakona)**

(1) Odredbe ovog zakona ne primjenjuju se na oružje i municiju pripadnika Oružanih snaga Bosne i Hercegovine, policijskih službenika, sudska policija, pripadnika straže kazнено-popravnih ustanova, uposlenika Obavještajno-sigurnosne agencije Bosne i Hercegovine i na uposlenike drugih državnih organa kada drže i nose oružje i municiju prema propisima svojih službi.

(2) Odredbe ovog zakona ne primjenjuju se na oružje koje se prevozi preko teritorije Federacije za potrebe nadležnih tijela drugih država u skladu sa odobrenjem nadležnih državnih organa Bosne i Hercegovine.

**Član 4.  
(Ravnopravnost spolova)**

Gramatička terminologija u ovom zakonu podrazumijeva uključivanje oba spola.

## **Član 5.** **(Primjena Zakona o upravnom postupku)**

Postupci koji se vode prema ovom zakonu za rješavanje zahtjeva stranaka radi utvrđivanja činjeničnog stanja i donošenja rješenja o pitanjima nabavljanja, nošenja i držanja oružja i u drugim slučajevima predviđenim ovim zakonom provode se prema odredbama Zakona o upravnom postupku („Službene novine Federacije BiH”, br. 2/98 i 44/99), osim u slučajevima u kojima je ovim zakonom određeno drugačije.

## **Član 6.** **(Značenje izraza)**

Pojedini izrazi upotrijebljeni u ovom zakonu imaju sljedeća značenja:

- a) *registracija oružja* je unos podataka o oružju i vlasniku, odnosno korisniku oružja u službene evidencije propisane ovim zakonom, kao i propisima donesenim na osnovu ovog zakona, uz izdavanje odgovarajuće isprave,
- b) *registrirano oružje* je oružje za koje je izdata odgovarajuća isprava o oružju,
- c) *vlasnik oružja* je fizičko ili pravno lice kome je izdata odgovarajuća isprava o oružju,
- d) *zajednički korisnici oružja* su lica koja koriste jedno isto lovačko ili sportsko oružje,
- e) *civilno strelište* je objekt namijenjen sportsko-rekreativnom gađanju koji ispunjava tehničke i sigurnosne uvjete za upotrebu registriranog ili prijavljenog oružja,
- f) *onesposobljavanje vatrenog oružja* je onesposobljavanje svih bitnih dijelova oružja na način da njihovim uklanjanjem, zamjenom ili izmjenom ne može biti omogućeno njegovo osposobljavanje,
- g) *ovlašteni trgovac oružjem* je pravno lice ili obrtnik koji posjeduje odobrenje nadležnog organa za bavljenje prometom oružja i municije,
- h) *prenošenje oružja* je premještanje oružja za koje je izdat oružni list sa jednog mjesta na drugo,
- i) *promet oružja i municije* je nabavljanje oružja i municije radi prodaje, smještaja i čuvanja oružja i municije radi prodaje, te njegova prodaja na malo i veliko u Federaciji,
- j) *popravljanje oružja* je otklanjanje kvarova na oružju i zamjena ili ugradnja originalnih dijelova,
- k) *prepravljavanje oružja* je prilagođavanje oružja drugoj municiji, zamjena ili ugradnja bitnih dijelova oružja i drugi zahvati na oružju kojima se utiče na njegovo funkcioniranje ili na tehničke karakteristike,
- l) *posebna oprema* za oružje je svaki mehanizam namijenjen kao dodatak za osnovni model oružja čijom primjenom se mijenjaju mogućnosti kod upotrebe oružja, osim optičkog nišana.

## **II. POJAM, VRSTE I KATEGORIZACIJA ORUŽJA**

### **Član 7.** **(Definicija oružja i municije)**

(1) Oružje u smislu ovog zakona predstavlja napravu izrađenu ili prilagođenu da pod pritiskom zraka, barutnih i drugih plinova ili drugog potisnog sredstva može izbaciti zrno, kuglu, sačmu ili neki drugi projektil, odnosno raspršiti plin ili tečnost, te druge naprave namijenjene za samoodbranu, lov ili sport.

(2) Oružjem se smatraju i bitni dijelovi oružja i to: cijev, cijev sa ležištem metka, okvir ili kućište zatvarača, navlaka ili bubanj, zatvarač ili sistem bravljenja, ulošci – adapteri za vatreno oružje sa olučenim i neolučenim cijevima, rukohvat sa mehanizmom za okidanje, te svaka druga naprava osmišljena ili prilagođena za smanjivanje buke izazvane pucanjem iz vatrene oružja.

(3) Pod municijom za vatreno oružje u smislu ovog zakona podrazumijeva se cjelovit metak koji sjedinjuje čahuru, kapislu, barutno punjenje i zrno ili sačmu.

## **Član 8.**

### **(Oružje koje se ne smatra oružjem prema ovom zakonu)**

(1) Prema ovom zakonu oružjem se ne smatra: dekorativno oružje, imitacija oružja, oružje trajno onesposobljeno za upotrebu tehničkim postupcima koji su određeni posebnim propisima ili su priznati od nadležnog organa, oružje namijenjeno za signaliziranje i spašavanje života, oružje namijenjeno za usmrćivanje životinja, podvodne puške i drugi predmeti koji snagom opruge, napete gume ili sabijenog plina izbacuju osti ili harpun namijenjen isključivo ribolovu, oružje koje se koristi u industrijske ili tehničke svrhe pod uvjetima da može biti korišteno u samo za to navedene svrhe, municija za zračno oružje, municija za oružje sa tetivom i lažna municija.

(2) Dekorativno oružje je oružje izrađeno u dekorativne svrhe i nije ga moguće upotrijebiti ili prepraviti u vatreno oružje.

(3) Imitacija oružja su predmeti koji su vanjskim izgledom slični ili jednaki oružju, ali ih nije moguće upotrijebiti niti prepraviti u vatreno oružje.

(4) Oružje za signalizaciju su pištolji, revolveri, puške i druge naprave koje pod pritiskom energije barutnog punjenja ispaljuju naboj namijenjen isključivo za izazivanje glasnog pucnja ili ispaljivanje svjetleće signalne zvjezdice.

## **Član 9.**

### **(Podjela oružja)**

(1) Oružje u smislu ovog zakona spade u sljedeće vrste i to: vatreno, zračno, plinsko, hladno, oružje sa tetivom, trofejno, staro, rasprskavajuće i sportsko oružje.

(2) Vatreno oružje su sve vrste pušaka, pištolja, revolvera, kao i sve vrste naprava iz kojih se pod pritiskom barutnih plinova izbacuje kroz cijev zrno, kugla, sačma ili drugi projektil a može biti kao:

a) *automatsko vatreno oružje* je oružje kod kojeg je jednokratnim pritiskom na obarač moguće ispaliti više metaka,

b) *poluautomatsko vatreno oružje* je oružje koje se nakon ispaljivanja metka automatski puni i kod kojeg je jednokratnim pritiskom na obarač moguće ispaliti samo po jedan metak,

c) *oružje sa repetirajućim mehanizmom* je oružje kod kojeg je nakon ispaljivanja svakog metka potrebno ručno pomoću mehanizma ubaciti metak u cijev,

d) *dugocijevno vatreno oružje* je oružje kod kojeg je cijev duža od 30 cm ili je njegova ukupna dužina veća od 60 cm,

e) *kratkocijevno vatreno oružje* je oružje čija cijev nije duža od 30 cm i čija ukupna dužina oružja ne prelazi 60 cm,

f) *oružje za jedinačnu paljbu* je oružje bez spremnika (magacina) koje se svaki put prije ispaljivanja metka puni ručno ubacivanjem metka u ležište cijevi ili ležište punjenja na kraju cijevi,

g) *lovačko oružje* je vatreno oružje kategorije B sa kojim je dozvoljeno loviti divljač prema zakonu kojim je reguliran lov u Federaciji.

(3) Zračno oružje su sve vrste pušaka, pištolja, revolvera kao i sve vrste naprava koje pod pritiskom zraka ili sabijenog plina izbacuju kroz cijev zrno, kuglu, dijabolu ili druge projekte.

(4) Plinsko oružje su sve vrste pušaka, pištolja, revolvera, kao i sve vrste naprava koje pod pritiskom barutnih plinova ili sabijenog plina raspršuju nadražljive materije.

(5) Hladno oružje su bodeži, kame, mačevi, sablje, bajoneti, skakavci čije se sječivo nalazi pod pritiskom sabijene opruge a iz drške iskaču pritiskom na dugme ili polugu ili metalne zvjezdice za bacanje, bez obzira na dužinu oštrice, bokseri, buzdovani, te druga oružja sa skrivenim oštricama, kao i predmeti pogodni za nanošenje povreda kada se nose na javnim mjestima.

(6) Oružje sa tetivom su lukovi, samostrijeli i druge naprave koje snagom napete tetive ili druge elastične materije pritiskuju strijelu ili drugi projektil.

(7) Trofejno oružje je vatreno, zračno i hladno oružje koje se čuva kao uspomena ranijeg perioda historije Bosne i Hercegovine ili za njegovog vlasnika predstavlja ličnu ili porodičnu uspomenu, a koje je od ovlaštene organizacije ili ovlaštenog pojedinca trajno onesposobljeno za upotrebu.

(8) Staro oružje je oružje koje ima historijsku vrijednost, oružje koje čini sastavni dio narodne nošnje, te vojno i policijsko oružje koje je dotrajalo i neupotrebljivo, oružje koje je sastavni dio vojnih i policijskih paradnih uniformi, oružje koje se puni sa usta cijevi crnim barutom, a pali kremenom, fitiljem ili kapislom i koje je od ovlaštene organizacije ili ovlaštenog pojedinca trajno onesposobljeno za upotrebu.

(9) Rasprskavajuće oružje su sve vrste bombi, mina, granata i drugih naprava opremljenih sa eksplozivnom materijom ili detonatorom (težina, udar, potez, trenje, hemijska reakcija, električna energija i sl.) kod kojih dolazi do oslobađanja energije i njihovog rasprskavanja.

(10) Sportsko oružje je vatreno oružje kategorije B, zračno oružje i oružje sa tetivom koje se koristi za sportske discipline u skladu sa posebnim propisima.

## **Član 10. (Druga sredstva)**

Pored oružja iz člana 9. ovog zakona koriste se sljedeća sredstva i to:

a) *optički nišan* - naprava kojom se oružju povećava preciznost,

b) *municija* - punjenje za vatreno oružje,

c) *lažna municija* - municija bez oštrog ili ubojitog zrna kojim se postiže efekat pucanja,

d) *sprej za omamljivanje* - naprava kojom se usmjereno izbacuju u vidu mlaza ili pjene neškodljive nadražljive materije za onesposobljavanje pojedinca i koje na ljudsko zdravlje imaju kratkotrajan učinak,

e) *električni paralizator* - ručna naprava koja privremeno onesposobljava lice pomoću visokog električnog napona,

f) *mužari – prangije* - ručne ili samostojeće naprave namijenjene za izazivanje glasnog pucnja konstruisane tako da ne mogu primiti cjeloviti naboj, pune se sa usta cijevi određenom količinom crnog baruta i pale štapinom, kremenom ili kapislom, a zatvaraju sredstvom male specifične težine,

g) *reprodukcija oružja* - kopija dugog i kratkog vatrenog oružja koja se puni sa usta cijevi crnim barutom i pali fitiljom, kremenom ili kapislom.

## **Član 11. (Kategorizacija oružja)**

Oružje iz člana 9. ovog zakona razvrstava se u četiri kategorije utvrđene u Direktivi Vijeća 91/477/EEZ od 18. jula 1991. o kontroli nabavljanja i držanja oružja (SL L 256, 03.09.1991.) i Direktivi 2008/51/EZ Evropskog parlamenta i Vijeća od 21. maja 2008. kojom se izmjenjuje i dopunjuje Direktiva Vijeća 91/477/EEZ o kontroli nabavljanja i držanja oružja (SL L 179, 08.07.2008.) sa kojima se vrši usklađivanje propisa iz oblasti nabavke, nošenja i držanja oružja i to:

### **1) Kategorija A**

- a) vojni projektili sa eksplozivnim punjenjem, lanseri i bacači,
- b) automatsko vatreno oružje,
- c) vatreno oružje kamuflirano tako da izgleda kao neki drugi predmet,
- d) municija sa probojnim, eksplozivnim, obilježavajućim ili zapaljivim projektilima, te projektili za takvu municiju,
- e) municija za pištolje i revolvere sa projektilom koji ima ekspanzijski učinak i projektili za takvu municiju, osim municije za lov ili sportsko streljaštvo za lica kojima je dozvoljeno da koriste to oružje,
- f) minsko-eksplozivna sredstva i dijelovi,
- g) oružje koje je izrađeno ili prerađeno bez odobrenja za promet oružjem, osim oružja iz kategorije C tačka c.,
- h) poluautomatsko vatreno oružje za civilnu upotrebu koje po svom autentičnom izgledu odgovara automatskom oružju,
- i) ostalo vatreno oružje koje nije obuhvaćeno kategorijama B, C ili D,
- j) posebna oprema za vatreno oružje;

### **2) Kategorija B**

- a) poluautomatsko ili repetirajuće kratkocijevno vatreno oružje,
- b) kratkocijevno oružje za jedinačnu paljbu sa središnjim paljenjem,
- c) kratkocijevno oružje za jedinačnu paljbu sa rubnim paljenjem,
- d) lovačko oružje u skladu sa Zakonom o lovstvu Federacije,
- e) poluautomatsko dugocijevno vatreno oružje sa magacinom i ležištem za najviše tri metka kod kojeg se magacin, odnosno opruga za punjenje može skinuti, odnosno nije sigurno da li je oružje napravljeno tako da se uz obični alat može prepraviti u oružje sa magacinom i ležištem za više od tri metka,
- f) repetirajuće i poluautomatsko dugocijevno vatreno oružje sa glatkom cijevi ukupne dužine do 60 cm,
- g) repetirajuće dugocijevno vatreno oružje koje nije obuhvaćeno u tački f),
- h) dugocijevno oružje za jedinačnu paljbu sa jednom ili više užlijebljenih cijevi,
- i) dugocijevno oružje za jedinačnu paljbu sa jednom ili više glatkih cijevi,

- j) poluautomatsko dugocijevno vatreno oružje koje nije obuhvaćeno tač. od d) do g) ovog stava i
- k) staro i trofejno oružje;

### **3) Kategorija C**

- a) plinsko oružje,
- b) reprodukcija vatrenog oružja kod kojeg se ne upotrebljava jedinstveni naboj,
- c) mužari (prangija);

### **4) Kategorija D**

- a) električni paralizator,
- b) raspršivači (sprejevi),
- c) oružje sa tetivom,
- d) hladno oružje,
- e) zračno oružje.

## **Član 12. (Ograničenja)**

(1) Oružje iz člana 11. ovog zakona se u pogledu prava i obaveza vlasnika oružja razvrstava u:

- a) zabranjeno oružje – oružje kategorije A i hladno oružje kojem je osnovna namjena napad ili nanošenje ozljeda, te hladno oružje kada se nosi na javnim mjestima;
- b) dozvoljeno oružje za koje je potrebno prethodno odobrenje – oružje kategorije B;
- c) dozvoljeno oružje za koje je potrebna prijava nadležnom organu – oružje kategorije C;
- d) dozvoljeno oružje za koje nije potrebno odobrenje niti prijava nadležnom organu – oružje kategorije D.

(2) Zabranjeno je nabavljanje ili držanje ili nošenje oružja kategorije A, osim ako ovim zakonom nije drugačije propisano, te nabavljanje ili držanje ili nošenje oružja kategorije B bez odgovarajućeg odobrenja o oružju, kao i držanje ili nošenje oružja kategorije C bez odgovarajućeg odobrenja.

(3) Oružje kategorije D mogu nabavljati, držati i nositi lica starija od 18 godina.

## **III. NABAVLJANJE, DRŽANJE I NOŠENJE ORUŽJA I MUNICIJE I ISPRAVE O ORUŽJU**

### **1. Nadležnost kantonalnog ministarstva unutrašnjih poslova**

#### **Član 13. (Nadležan za postupanje po ovom zakonu)**

Kantonalno ministarstvo unutrašnjih poslova (u daljnjem tekstu: kantonalno ministarstvo) obavlja poslove koji se odnose na nabavku, nošenje i držanje oružja i municije, kao i druge poslove koji su ovim zakonom stavljeni u nadležnost tog ministarstva, osim poslova koji su ovim zakonom stavljeni u nadležnost Federalnog ministarstva unutrašnjih poslova (u daljnjem tekstu: Federalno ministarstvo).

## **Član 14. (Izdavanje odobrenja i oružnog lista)**

(1) Kantonalno ministarstvo izdaje odobrenja, oružne listove i druge akte za nabavljanje, držanje i nošenje oružja i municije u skladu sa ovim zakonom i to:

- a) odobrenje za nabavku oružja,
- b) odobrenje za nabavku municije,
- c) odobrenje za držanje oružja,
- d) odobrenje za sakupljanje starog i držanje trofejnog oružja,
- e) oružni list za držanje oružja,
- f) oružni list za držanje i nošenje oružja,
- g) potvrde o prijavi oružja kategorije C,
- h) odobrenje za popravljanje i prepravljanje oružja,
- i) odobrenje za promet oružja i municije,
- j) odobrenje za osnivanje i vođenje civilnih strelišta,
- k) i druge akte koji su ovim zakonom stavljeni u nadležnost kantonalnog ministarstva.

(2) Odobrenje iz stava (1) ovog člana izdaje se onda kada se u upravnom postupku utvrdi da podnosilac zahtjeva ispunjava uvjete propisane ovim zakonom, a ako se utvrdi da nisu ispunjeni svi uvjeti zahtjev podnosioca (zahtjeva) mora biti odbijen.

(3) Poslove iz stava (1) ovog člana obavljaju organizacione jedinice kantonalnog ministarstva koje se utvrde Zakonom o unutrašnjim poslovima i Pravilnikom o unutrašnjoj organizaciji tog ministarstva.

(4) Odobrenja iz stava (1) ovog člana izdaju se u obliku rješenja.

(5) Izgled i sadržaj obrazaca akata iz stava (1) ovog člana bliže se uređuju propisom koji donosi federalni ministar unutrašnjih poslova (u daljnjem tekstu: federalni ministar).

## **2. Nabavka oružja za fizičko lice**

### **Član 15. (Zahtjev za izdavanje odobrenja)**

(1) Fizička i pravna lica mogu nabavljati, držati i nositi oružje i municiju ako imaju odobrenje za nabavku oružja i municije izdato u skladu sa ovim zakonom.

(2) Odobrenje iz stava 1. ovog člana izdaje kantonalno ministarstvo prema prebivalištu podnosioca zahtjeva, odnosno prema sjedištu pravnog lica.

(3) Odobrenje za nabavljanje oružja i municije izdaje se na zahtjev fizičkog ili pravnog lica. Zahtjev se podnosi na obrascu čiji će sadržaj biti utvrđen propisom iz člana 14. stav (5) ovog zakona.

(4) Uz zahtjev se prilažu propisani dokazi i to:

- a) za fizičko lice dokazi iz člana 16. ovog zakona,
- b) za pravno lice dokazi iz člana 22. ovog zakona.

### **Član 16. (Uvjeti za izdavanje odobrenja za nabavljanje oružja)**

(1) Odobrenje za nabavku oružja može se izdati fizičkom licu koje ispunjava opće i posebne uvjete utvrđene u st. (2) i (3) ovog člana.

(2) Opći uvjeti su:

- a) navršena 21 godina života,



b) opravdan razlog za nabavku oružja,

c) pravomoćno nije osuđeno za krivična djela protiv: Bosne i Hercegovine i Federacije, vrijednosti zaštićenih međunarodnim pravom, života i tijela, opće sigurnosti ljudi i imovine, te krivična djela koja u sebi sadrže elemente nasilja a sadržani su u krivičnim djelima protiv imovine, slobode i prava čovjeka i građanina, spolne slobode i spolnog morala, braka, porodice i mladeži, pravosuđa, javnog reda, službene dužnosti, Oružanih snaga Bosne i Hercegovine, okoliša i čovjekove sredine koja se odnose na mučenje ili ubijanje životinja,

d) nije potvrđena optužnica, niti se vodi istraga ili krivični postupak za krivična djela iz tačke c) ovog stava, osim za krivična djela protiv sigurnosti javnog saobraćaja propisana važećim krivičnim zakonima u Bosni i Hercegovini,

e) u posljednje dvije godine do dana podnošenja zahtjeva za izdavanje odobrenja nije kažnjavano za prekršaj utvrđen ovim zakonom, za prekršaj protiv javnog reda i mira sa obilježjem nasilja ili za prekršaj sa obilježjem nasilja utvrđen drugim zakonom ili se protiv tog lica ne vodi postupak za takve prekršaje,

f) ne postoje druge okolnosti koje ukazuju da bi oružje moglo biti zloupotrijebljeno, naročito prekomjerno uživanje alkohola, uživanje narkotičkih sredstava ili drugih omamljujućih sredstava, poremećeni porodični odnosi, sukobi sa okolinom, agresivno i eksczesno ponašanje, te drugi poremećaji u ponašanju, povrede propisa o lovu ili sportskom streljaštvu i sl.

(3) Posebni uvjeti su:

a) zdravstveno je sposobno za držanje i nošenje oružja,

b) raspolaže stručnim i tehničkim znanjem i vještinom za pravilno rukovanje oružjem i poznaje propise koji se odnose na držanje i nošenje oružja,

c) ima uvjete za siguran smještaj i čuvanje oružja i municije.

(4) Izuzetno od stava (3) tačka a) ovog člana, odobrenje se može izdati i licima iz člana 3. ovog zakona sa navršenih 18 godina života i članovima sportskih streljačkih udruženja koji se aktivno takmiče u streljaštvu i ukoliko je izdavanje odobrenja licu uvjet za zasnivanje radnog odnosa.

## **Član 17.**

### **(Opravdani razlozi za izdavanje odobrenja za nabavku oružja fizičkom licu)**

(1) Opravdani razlog iz člana 16. stav (2) tačka b) ovog zakona za izdavanje odobrenja za nabavku oružja postoji:

a) ako se ocjeni da je za fizičko lice njegova lična sigurnost ugrožena ili bi mogla biti ugrožena u tolikoj mjeri da mu je za njegovo osiguranje potrebno oružje, ili ukoliko zbog prirode poslova koje obavlja ili okolnosti u kojim ga obavlja postoji potreba za nabavkom oružja;

b) za nabavku lovačkog oružja ako je fizičko lice član lovačkog društva i ima položen lovački ispit;

c) za nabavku sportskog oružja ako je fizičko lice član sportske streljačke organizacije.

(2) Postojanje uvjeta iz člana 16. stav (3) tačka b) ovog zakona dokazuje se uvjerenjem kantonalnog ministarstva ili Federalnog ministarstva koji je vršio obuku podnosioca zahtjeva za pravilno rukovanje vatrenim oružjem i o poznavanju propisa koji se odnose na držanje i nošenje oružja u skladu sa propisom iz stava (4) ovog člana.

(3) Uvjete iz člana 16. stav (3) tačka c) utvrđuje kantonalno ministarstvo u skladu sa propisom iz stava (4) ovog člana.

(4) Način, postupak i dokazi za utvrđivanje uvjeta iz člana 16. ovog zakona i izdavanje odobrenja iz člana 14. stav (1) tačka a) ovog zakona, te druga pitanja koja se odnose na izdavanje odobrenja, kao i program i način provođenja stručnog i tehničkog znanja iz člana 16. stav (3) tačka b) ovog zakona propisat će federalni ministar.

### **Član 18. (Zdravstvena sposobnost fizičkog lica)**

(1) Zdravstvena sposobnost fizičkog lica iz člana 16. stav (3) tačka a) ovog zakona dokazuje se uvjerenjem o zdravstvenoj sposobnosti koje izdaje zdravstvena ustanova koju određuje kantonalno ministarstvo nadležno za zdravstvo u saradnji sa kantonalnim ministrom unutrašnjih poslova.

(2) Svaka zdravstvena ustanova ili svaki liječnik koji ima saznanje o promjeni zdravstvenog stanja fizičkog lica imaoca oružja, a koje može uticati na sposobnost za držanje i nošenje oružja - dužan je odmah po saznanju o takvoj promjeni obavijestiti kantonalno ministarstvo, što će se bliže urediti u propisu iz stava (3) ovog člana.

(3) Bliže uvjete koje moraju ispunjavati zdravstvene ustanove koje će obavljati zdravstvene preglede kojima se utvrđuje zdravstvena sposobnost fizičkog lica za držanje ili držanje i nošenje oružja, način i postupak obavljanja zdravstvenih pregleda, popis bolesti i zdravstvenih stanja koja lice čine nepodobnim za držanje i nošenje oružja, način vođenja evidencije i medicinske dokumentacije i sadržaj uvjerenja o izvršenom zdravstvenom pregledu, kao i naknade u vezi sa utvrđivanjem zdravstvene sposobnosti propisuje federalni ministar zdravstva u saradnji sa federalnim ministrom.

## **3. Nabavka oružja za pravna lica**

### **Član 19. (Odobrenje za nabavku oružja pravnom licu)**

(1) Pravno lice može dobiti odobrenje iz člana 14. stav (1) tačka a) ovog zakona ako ispunjava sljedeće uvjete:

- a) ima opravdan razlog za nabavku oružja,
- b) ispunjava uvjete iz člana 16. stav (3) tačka c) ovog zakona,
- c) odgovorno lice i lice koje ima ovlaštenje za nošenje oružja u pravnom licu ispunjava opće i posebne uvjete iz člana 16. ovog zakona, izuzev uvjeta iz stava (2) tačka b) i stava (3) tačka c) tog člana.

(2) Opravdani razlog iz stava (1) tačka a) ovog člana postoji u slučajevima ako je kod suda ili drugog nadležnog organa pravno lice registrirano za obavljanje djelatnosti lova, uzgoja divljači, sportskog streljaštva, vođenje civilnih strelišta, obavljanje poslova fizičke zaštite, naučnog istraživanja za koje je potrebno oružje, prikupljanje stručnih podataka o životinjskim vrstama, muzeji, te aerodromi radi odstrjela, plašenja i rastjerivanja ptica i divljači. Opravdani razlog postoji i u slučaju ako je pravno lice organiziralo vlastitu unutrašnju službu zaštite ljudi i imovine u skladu sa Zakonom o agencijama i unutrašnjim službama za zaštitu ljudi i imovine.

(3) Pravno lice koje je registrirano za djelatnosti iz stava (2) ovog člana može posjedovati vatreno oružje čiji broj zavisi od potrebe i broja zaposlenih lica koja imaju potrebu da koriste oružje, s tim što se za agencije i vlastite unutrašnje službe zaštite za zaštitu ljudi i imovine broj oružja određuje prema zakonu navedenom u stavu (2) ovog člana.

#### **Član 20.**

##### **(Lice ovlašteno za rukovanje i korištenje oružja kod pravnog lica)**

(1) Rukovanje i korištenje oružja u pravnom licu iz člana 19. ovog zakona mogu vršiti samo lica koja ispunjavaju uvjete propisane članom 16. stav (2) tač. c), d), e) i f), stav (3) tač. a) i b) i stav (4) ovog zakona.

(2) Uvjeti za smještaj i čuvanje oružja i municije u pravnom licu propisat će se u propisu iz člana 18. stav (3) ovog zakona.

#### **4. Važenje i oduzimanje odobrenja za nabavku oružja**

#### **Član 21.**

##### **(Važenje odobrenja)**

(1) Odobrenje za nabavku oružja fizičkom i pravnom licu izdaje se sa rokom važenja šest mjeseci od dana njegovog izdavanja.

(2) Ako odobrenje za nabavku oružja nije iskorišteno u roku iz stava (1) ovog člana fizičko ili pravno lice je obavezno to odobrenje vratiti kantonalnom ministarstvu u roku osam dana od dana isteka roka važenja.

(3) Rok važenja odobrenja iz stava (1) i obaveza iz stava (2) ovog člana obavezno se navode u rješenjima o izdavanju odobrenja.

#### **Član 22.**

##### **(Oduzimanje odobrenja)**

(1) Odobrenje iz člana 14. stav (1) tačka a) ovog zakona oduzet će se ako nakon izdavanja odobrenja stranka prestane ispunjavati jedan od uvjeta za izdavanje odobrenja koji su utvrđeni u članu 16. za fizičko lice, odnosno u članu 19. ovog zakona za pravno lice.

(2) Oduzimanje odobrenja iz stava (1) ovog člana vrši se rješenjem koje donosi kantonalno ministarstvo prema mjestu prebivališta fizičkog lica, odnosno sjedištu pravnog lica.

#### **5. Izdavanje oružnog lista**

#### **Član 23.**

##### **(Registracija oružja)**

(1) Kada fizičko ili pravno lice nabavi oružje na osnovu odobrenja iz člana 14. stav (1) ovog zakona, obavezno je podnijeti zahtjev za registraciju oružja u roku osam dana od dana nabavke. Zahtjev se podnosi kantonalnom ministarstvu koje je izdalo odobrenje.

(2) Za registrirano oružje iz stava (1) ovog člana fizičkom licu se izdaje oružni list za držanje ili oružni list za držanje i nošenje oružja, a pravnom licu odobrenje za držanje oružja.

(3) Oružni list iz stava (2) ovog člana izdaje se sa rokom važenja pet godina.

(4) Imalac oružja za koje je izdat oružni list dužan je u roku 30 dana prije isteka roka iz stava (3) ovog člana podnijeti zahtjev za produženje važenja te isprave. Uz zahtjev je dužan priložiti dokaz o ispunjavanju uvjeta u pogledu zdravstvene sposobnosti za držanje ili držanje i nošenje oružja.

(5) Na zahtjev za produženje važenja oružnog lista fizičkom licu važnost tog lista produžava se na rok pet godina ukoliko se utvrdi da su ispunjeni uvjeti iz člana 16. stav (2) tač. b) c), d), e) i f) i stav (3) tač. a) i c) ovog zakona.

#### **Član 24. (Odbijanje izdavanja oružnog lista)**

(1) Kantonalno ministarstvo odbit će zahtjev iz člana 23. stav (1) ovog zakona u sljedećim slučajevima:

a) ako u postupku registracije utvrdi da podnosilac zahtjeva ne ispunjava uvjete za izdavanje odobrenja iz člana 14. stav (1) tačka a) ovog zakona,

b) ako za oružje koje je nabavljeno na osnovu tog odobrenja ne može dokazati porijeklo,

c) ako oružje koje prije stavljanja u promet nije označeno žigom ili obilježeno u skladu sa posebnim zakonom.

(2) Odbijanje zahtjeva iz stava (1) ovog člana vrši se rješenjem.

(3) U slučaju iz stava (1) ovog člana oružje i odobrenje za nabavku oružja se oduzima bez prava na naknadu i uništava se u skladu sa ovim zakonom, što se navodi u rješenju iz stava (2) ovog člana.

### **6. Izdavanje odobrenja za nabavku municije**

#### **Član 25. (Odobrenje za nabavku municije)**

(1) Kantonalno ministarstvo može izdati odobrenje za nabavku municije iz člana 14. stav (1) tačka b) ovog zakona fizičkom, odnosno pravnom licu ako ima oružni list, odnosno odobrenje o držanju oružja iz člana 23. ovog zakona sa rokom važenja šest mjeseci od dana izdavanja.

(2) Odobrenje iz stava (1) ovog člana izdat će se i licima koja imaju odobrenje za obavljanje djelatnosti popravke i prepravke oružja, vođenje civilnog strelišta, sportskim streljačkim organizacijama koje su upisane u registar udruženja, pravnim licima registriranim za obavljanje djelatnosti lova.

(3) Municija za puške sa neolučenim cijevima i za zračno oružje može se nabaviti na osnovu odgovarajuće isprave za to oružje.

(4) Ako odobrenje za nabavku municije nije iskorišteno u roku iz stava (1) ovog člana, fizičko ili pravno lice dužno je odobrenje iz stava (1) ovog člana vratiti kantonalnom ministarstvu koje je izdalo to odobrenje u roku osam dana od isteka roka važenja.

## **7. Izdavanje odobrenja za sakupljanje i držanje starog i trofejnog oružja**

### **Član 26.**

#### **(Odobrenje za sakupljanje starog i držanje trofejnog oružja)**

(1) Odobrenje za sakupljanje starog i držanje trofejnog oružja iz člana 14. stav (1) tačka d) ovog zakona izdaje se sa trajnim rokom važenja fizičkom licu koje ispunjava opće i posebne uvjete iz člana 16. ovog zakona, a pravnom licu ili obrtniku ako ispunjava uvjete iz člana 20. ovog zakona.

(2) Oružje koje se drži na osnovu odobrenja iz stava (1) ovog člana ne smije se nositi, upotrebljavati, niti je za njega dozvoljeno nabavljati, držati ili izrađivati municiju.

## **8. Oružje sa obavezom prijavljivanja**

### **Član 27.**

#### **(Oružje sa obavezom prijavljivanja kantonalnom ministarstvu)**

(1) Oružje kategorije C može nabavljati i držati fizičko lice starije od 18 godina i pravno lice bez odobrenja, s tim da su dužni prijaviti kantonalnom ministarstvu nabavku i držanje tog oružja u roku osam dana od dana nabavke na obrascu prijave utvrđene u propisu iz člana 14. stav (5) ovog zakona. Uz prijavu je stranka dužna priložiti i dokaz o porijeklu oružja.

(2) Ovlašteni trgovac oružjem dužan je prodaju oružja kategorije C prijaviti nadležnom kantonalnom ministarstvu u roku osam dana od dana prodaje oružja na obrascu prijave utvrđene u propisu iz člana 14. stav (5) ovog zakona.

## **IV. POSTUPANJE SA ORUŽJEM I MUNICIJOM**

### **Član 28.**

#### **(Prodaja, predaja, zamjena i onesposobljavanje oružja i municije)**

(1) Oružje iz člana 7. ovog zakona može se prodati ili predati samo licu koje ima odgovarajuću važeću ispravu iz člana 14. stav (1) ovog zakona, s tim da se municija može prodati ili predati samo licu koje ima važeću ispravu iz člana 14. stav (1) tačka b) ovog zakona.

(2) Ovlašteni trgovac za promet oružja i municije u skladu sa ovim zakonom dužan je o prodaji oružja i municije koja se nabavlja na osnovu odobrenja iz člana 14. stav (1) tač. a) i b) ovog zakona, obavijestiti kantonalno ministarstvo koje je izdalo ta odobrenja u roku osam dana od dana prodaje oružja, odnosno municije.

(3) Fizičko i pravno lice koje proda oružje za koje je izdata odgovarajuća isprava iz člana 14. stav (1) tač. c), d), e), f) i g) ovog zakona dužno je o prodaji oružja obavijestiti kantonalno ministarstvo koje je izdalo te isprave u roku osam dana od dana prodaje, s tim da je fizičko, odnosno pravno lice dužno prodato oružje odjaviti iz registra kod kantonalnog ministarstava kod kojeg je registrirano prodato oružje u roku osam dana od dana prodaje.

(4) Zamjena vatrenog oružja može se izvršiti samo ako isprave iz člana 14. stav (1) tač. c), d) i f) ovog zakona glase na istu vrstu vatrenog oružja.

(5) Zamjena oružja iz stava (4) ovog člana može se izvršiti i sa pravnim licem iz člana 19. ovog zakona koji je dužan u roku osam dana od dana izvršene zamjene obavijestiti kantonalno ministarstvo kod kojeg je registrirano zamjenjeno oružje, s tim da su fizičko, odnosno pravno lice koji zamjene oružje dužni u roku osam dana od dana zamjene o zamjeni obavijestiti kantonalno ministarstvo i podnijeti zahtjev za registraciju zamjenjenog oružja.

(6) Fizičko lice koje posjeduje oružje za koje je izdata isprava iz člana 14. stav (1) tač. c), d) i f) ovog zakona može takvo oružje trajno onesposobiti za upotrebu kod pravnog lica koje ima odobrenje nadležnog organa za obavljanje djelatnosti popravke, prepravke i onesposobljavanja oružja. Ovlašteno lice koje je izvršilo onesposobljavanje oružja izdaje potvrdu na obrascu utvrđenom u propisu iz člana 14. stav (5) ovog zakona.

(7) Troškove onesposobljavanja oružja iz stava (6) ovog zakona snosi vlasnik oružja koji je dužan prijaviti trajno onesposobljeno oružje kantonalnom ministarstvu kod kojeg je registrirano onesposobljeno oružje u roku osam dana od dana onesposobljavanja, uz podnesenu potvrdu iz stava (6) ovog člana radi poništenja isprava iz člana 14. stav (1) tač. c), e) i f) ovog zakona.

(8) Vatrene oružje koje je onesposobljeno za upotrebu ne smije se osposobljavati.

## **Član 29.**

### **(Postupanje sa oružjem i municijom i nošenje oružja i municije)**

(1) Sa oružjem i municijom mora se postupati sa naročitom pažnjom koja se pokazuje u pravilnom čuvanju, pravilnom stručnom i pažljivom rukovanju, nošenju, prenošenju i držanju u ispravnom stanju.

(2) Građani su dužni pridržavati se pravila javno istaknutih zabrana o unošenju oružja i municije u određene prostore ili prostorije.

(3) Zabranjeno je nošenje oružja iz člana 7. ovog zakona na javnim, vjerskim i sportskim okupljanjima, u školama, zdravstvenim i javnim ustanovama, ugostiteljskim objektima i prostorima koji se koriste za pružanje ugostiteljskih usluga, osim sportsko oružje u slučaju kada se koristi i nosi radi takmičenja u gađanju.

(4) Oružje se ne smije nositi na javnom mjestu na način kojim se može izazvati osjećaj fizičke ugroženosti, uznemirenosti ili negodovanje građana.

(5) Fizičko lice ne smije nositi oružje kada je pod uticajem alkohola, opojnih droga ili drugih omamljujućih sredstava, odnosno kada je u takvom stanju da nije u mogućnosti shvatiti značenje svog postupanja, odnosno vladati svojom voljom.

(6) Oružje kategorije B ne smije se nositi bez isprava iz člana 14. stav (1) tač. c), e) i f) ovog zakona.

(7) Vlasnik ili korisnik oružja kojem je izdata isprava iz člana 14. stav (1) tač. c), e) i f) ovog zakona može prenositi oružje samo radi popravljanja, prepravljanja, onesposobljavanja ili korištenja na strelištu na način da je oružje rasklopljeno, ukoliko je to tehnički moguće ili da je municija fizički odvojena od oružja u odgovarajućim navlakama ili kovčezima.

(8) Van lovišta, odnosno strelišta vatreno i zračno oružje mora se držati, odnosno nositi u futrola i ne smije biti napunjeno.

### **Član 30. (Čuvanje oružja i municije)**

(1) Oružje i municija moraju se čuvati tako da nisu dostupni fizičkom licu koje nije ovlašteno posjedovati oružje, a naročito djeci. Oružje i municija moraju biti zaključani i odvojeni u metalnom ormaru, sefu ili sličnom spremištu koje se ne može otvoriti alatom uobičajene upotrebe.

(2) Oružje i municija moraju se čuvati u stambenom ili drugom odgovarajućem prostoru koji se nalazi u mjestu prebivališta, odnosno sjedišta vlasnika ili korisnika oružja i municije.

(3) Imalac oružja koji oružje drži na osnovu isprava iz člana 14. stav (1) tač. c), e) i f) ovog zakona dužan je na poziv kantonalnog ministarstva donijeti oružje na pregled.

(4) Federalni ministar propisat će uvjete za siguran smještaj i čuvanje oružja i municije iz stava (1) ovog člana i način pregleda oružja i municije.

### **Član 31. (Predaja dotrajalog oružja)**

(1) Imalac oružja čije je oružje dotrajalo u tolikoj mjeri da njegova upotreba može ugroziti sigurnost ljudi, a ne postoji mogućnost da se oružje popravi ili prepravi, dužan je takvo oružje predati kantonalnom ministarstvu kod kojeg je registrirano oružje i podnijeti zahtjev da se brišu iz evidencije o registriranom oružju.

(2) Oružje iz stava (1) ovog člana kantonalno ministarstvo zaprima uz izjavu stranke koju daje na zapisnik da se oružje predaje bez naknade. Za predato oružje kantonalno ministarstvo izdaje potvrdu o predatom oružju.

(3) Sa zamjenjenim tehnički neispravnim dijelovima vatrenog oružja postupa se u skladu sa st. (1) i (2) ovog člana.

(4) Oružje iz stava (1) ovog člana kao i dijelovi iz stava (3) ovog člana uništavaju se u skladu sa odredbama ovog zakona.

### **Član 32. (Postupci sa oružjem i municijom u slučaju napuštanja mjesta prebivališta)**

(1) Vlasnik oružja i municije koji napušta mjesto prebivališta na period duže od 60 dana, a oružje i municiju koje prema ovom zakonu posjeduje na osnovu isprava iz člana

14. stav (1) tač. c), e) i f) ovog zakona ne nosi sa sobom, dužan je oružje i municiju predati na čuvanje fizičkom licu koje ima odgovarajuću ispravu za tu vrstu oružja ili ovlaštenom trgovcu oružjem.

(2) Vlasnik oružja i municije dužan je u slučaju iz stava (1) ovog člana o predaji oružja i municije na čuvanje obavijestiti kantonalno ministarstvo kod kojeg je registrirano oružje u roku osam dana od dana predaje o čemu će kantonalno ministarstvo izdati potvrdu o prijemu tog obavještenja.

### **Član 33. (Rukovanje oružjem i upotreba oružja)**

(1) Vlasnik oružja dužan je oružje održavati u ispravnom stanju, te pravilno i sa naročitom pažnjom njime rukovati.

(2) Zabranjena je upotreba oružja na javnom mjestu i drugim mjestima na kojima se upotrebom oružja može ugroziti sigurnost ljudi i imovine, te narušiti javni red i mir.

(3) Lovačko oružje se ne smije upotrebljavati izvan lovišta ili civilnih strelišta.

(4) Sportsko oružje se ne smije upotrebljavati izvan civilnih i sportskih strelišta.

(5) Izuzetno od odredbe stava (4) ovog člana, zračno oružje i luk se smiju upotrebljavati i na mjestima koja su po svom položaju ili prema poduzetim mjerama osiguranja takva da se ne može ugroziti sigurnost građana.

(6) Zračno oružje ili luk mogu koristiti i djeca starija od 11 godina na sportskim strelištima i na drugim mjestima određenim i uređenim za vježbe gađanja pod nadzorom trenera koji ispunjava uvjete iz člana 16. ovog zakona i uvjete propisane posebnim propisom o sportu.

(7) Oružje je zabranjeno dati na upotrebu djeci, osim prema odredbama ovog zakona.

(8) Lovačko i sportsko oružje smije se izvan lovišta, odnosno strelišta prenositi u odgovarajućim navlakama ili kovčezima nenapunjeno.

(9) Električni paralizatori i raspršivači (sprejevi) iz kategorije D smiju se upotrebljavati samo za samoodbranu.

### **Član 34. (Davanje oružja na poslugu (posudbu)??)**

(1) Zabranjeno je davanje pištolja i revolvera na poslugu drugom fizičkom i pravnom licu.

(2) Lovačko i sportsko oružje može se davati na poslugu drugom licu koje ima odgovarajuću ispravu za tu vrstu oružja, kao i u slučajevima propisanim u čl. 35. i 36. ovog zakona.

(3) Zabranjeno je davanje na poslugu vatrenog oružja maloljetnim licima.

### **Član 35. (Davanje na poslugu sportskog oružja)**

(1) Streljačke organizacije mogu davati na poslugu oružje i municiju samo svojim članovima i to za vrijeme dok vrše vježbe gađanja ili se takmiče u gađanju na strelištu ili na drugom terenu određenom za vršenje vježbi gađanja, odnosno takmičenja u gađanju.



(2) Ako se magacin oružja streljačke organizacije ne nalazi na strelištu, članovi streljačke organizacije moraju za nošenje oružja do strelišta ili do drugog terena određenog za vršenje vježbi gađanja, odnosno takmičenja u gađanju imati potvrdu streljačke organizacije o vršenju vježbi gađanja, odnosno takmičenja u gađanju. Ova potvrda važi samo za dane kada se vrši vježba gađanja, odnosno takmičenje u gađanju.

### **Član 36.** **(Davanje na poslugu lovačkog oružja)**

(1) Organizacija koja gazduje lovištem može radi odstrela divljači članovima domaćih i inozemnih lovačkih organizacija dati na poslugu lovačko oružje i municiju najduže osam dana i to samo za lov u određenom lovištu o čemu je dužna odmah, a najkasnije u roku 48 sati obavijestiti kantonalno ministarstvo kod kojeg je registrirano to oružje.

(2) Za oružje i municiju izdatu na poslugu prema stavu (1) ovog člana organizacija koja gazduje lovištem izdaje potvrdu za nošenje oružja i municije o čemu vodi evidenciju.

(3) Lice kome je dato oružje i municija na poslugu prema odredbama st. (1) i (2) ovog člana ne smije iznositi oružje i municiju van lovišta kojim gazduje organizacija iz stava (1) ovog člana.

### **Član 37.** **(Povjeravanje nošenja oružja i municije)**

(1) Državni organi, kao i pravna lica koja su organizirala unutrašnju službu za zaštitu u skladu sa Zakonom o agencijama i unutrašnjim službama za zaštitu ljudi i imovine i koja drže oružje i municiju na osnovu tog zakona, mogu povjeriti nošenje tog oružja samo licima koja obavljaju poslove zaštite i ispunjavaju uvjete za nošenje oružja propisane ovim zakonom i Zakonom o agencijama i unutrašnjim službama za zaštitu ljudi i imovine.

(2) Lica iz stava (1) ovog člana oružje i municiju koje im je povjereno mogu nositi samo za vrijeme dok obavljaju poslove zaštite koje ne smiju iznositi van objekta ili područja koje se osigurava ili čuva.

(3) Izuzetno od odredbe stava (2) ovog člana, čuvari usjeva i šuma i čuvari lova i ribolova koji ne stanuju na području koje čuvaju mogu iznositi oružje i van tog područja i nositi ga do mjesta stanovanja, a čuvari stada, kao i lica koja osiguravaju imovinu koja se prevozi ili prenosi mogu nositi oružje prilikom osiguravanja te imovine.

(4) Državni organi, kao i pravna lica iz stava (1) ovog člana dužna su izdati potvrdu licu kojem povjeravaju oružje i o tome su dužni obavijestiti kantonalno ministarstvo kod kojeg je registrirano oružje. Potvrda se izdaje na obrascu utvrđenom u propisu iz člana 14. stav (5) ovog zakona.

### **Član 38.** **(Postupanje u slučaju prestanka potrebe za držanjem oružja i municije)**

(1) Državni organ i pravno lice kod kojeg je iz bilo kojeg razloga prestala potreba za daljnjim držanjem oružja i municije dužni su o tome u roku 30 dana obavijestiti kantonalno ministarstvo na čijem području se oružje i municija drže.

(2) Kantonalno ministarstvo preuzet će oružje i municiju iz stava (1) ovog člana i postupiti prema odredba člana 48. stav (8) ovog zakona.

### **Član 39.**

#### **(Postupanje u slučaju gubljenja ili krađe oružja i municije ili isprave o oružju)**

(1) Državni organ, pravno lice i fizičko lice koje drži i nosi registrirano oružje kategorije B i C i oružje nabavljeno na osnovu odobrenja za nabavljanje oružja, a nije registrirano u roku iz člana 22. stav (1) ovog zakona, kao i gubljenje ili krađa isprava iz člana 14. stav (1) ovog zakona, dužni su odmah prijaviti gubljenje ili krađu oružja i municije, odnosno isprava najkasnije u roku 24 sata od dana saznanja za gubljenje, odnosno krađu oružja. U prijavi se moraju navesti okolnosti pod kojima su oružje i municija ili isprave o oružju izgubljeni ili ukradeni, a koje su podnosiocu prijave poznati.

(2) Nestanak isprava iz člana 14. stav (1) ovog zakona lica iz stava (1) ovog člana oglašavaju u „Službenim novinama Federacije BiH“ o vlastitom trošku.

### **Član 40.**

#### **(Postupanje sa nađenim oružjem ili municijom)**

(1) Ko nađe oružje ili municiju ili sazna za skriveno oružje i municiju dužan je o tome odmah obavijestiti kantonalno ministarstvo ili policijskog službenika.

(2) Kantonalno ministarstvo ili policijski službenik iz stava (1) ovog člana dužan je nađeno oružje ili municiju, ukoliko nije predmet krivičnog djela ili prekršaja, predati organu koji ga vodi u evidenciji o nađenom oružju radi predaje vlasniku.

(3) Ukoliko vlasnik oružja iz stava (2) ovog člana u roku jedne godine od dana obavještanja o pronalasku oružja bez opravdanog razloga ne preuzme oružje u tom slučaju se postupa u skladu sa odredbama člana 44. i člana 48. stav (8) ovog zakona.

### **Član 41.**

#### **(Promjena prebivališta, ličnog imena, naziva ili sjedišta)**

(1) Ako imalac oružja kojem je izdata odgovarajuća isprava o oružju promijeni prebivalište, odnosno sjedište dužan je u roku 30 dana od dana promjene prebivališta, odnosno sjedišta prijaviti promjenu prebivališta, odnosno sjedišta kantonalnom ministarstvu na čijem području se nalazi novo prebivalište, odnosno sjedište radi upisa u odgovarajuću evidenciju isprava o oružju.

(2) Kada fizičko ili pravno lice koje prema ovom zakonu posjeduje oružje promijeni lično ime ili naziv, dužno je o tome obavijestiti kantonalno ministarstvo u roku 30 dana od dana te promjene radi upisa odgovarajućih podataka u službene evidencije i isprave o oružju.

### **Član 42.**

#### **(Postupanje sa oružjem i municijom u slučaju smrti vlasnika oružja)**

(1) U slučaju smrti vlasnika oružja i municije punoljetni član njegove porodice, zakonski zastupnik, staratelj, lice koje je sa njim živjelo u zajedničkom domaćinstvu ili lice kod kojeg se oružje i municija u trenutku smrti nalazilo, dužno je odmah po saznanju o

postojanju oružja i municije obavijestiti kantonalno ministarstvo radi predaje koje će o predatom oružju i municiji izdati potvrdu na obrascu utvrđenom u propisu iz člana 14. stav (5) ovog zakona.

(2) Nasljednik oružja i municije dužan je u roku 60 dana od dana pravomoćnosti rješenja o nasljeđivanju:

- a) oružje i municiju prodati ili pokloniti ili,
- b) podnijeti zahtjev za registraciju oružja i municije ili,
- c) onesposobiti oružje i municiju, te ga zadržati ili,
- d) predati kantonalnom ministarstvu bez naknade.

(3) Izuzetno od stava (2) ovog člana, oružje i municija maloljetnog nasljednika čuvat će se kod kantonalnog ministarstva dok ne navršši 21 godinu života.

(4) Nasljednik oružja iz stava (3) ovog člana sa navršenom 21 godinom života dužan je sa oružjem postupati na način propisan stavom (2) ovog člana, te ukoliko oružje proda dužan je oružje objavit kod kantonalnog ministarstva u roku osam dana od dana prodaje.

### **Član 43.**

#### **(Postupanje sa nasljeđenim oružjem i municijom)**

(1) Nasljedniku oružja koji podnese zahtjev za registraciju nasljeđenog oružja i municije kantonalno ministarstvo izdat će ispravu o oružju ukoliko ispunjava opće i posebne uvjete iz člana 16. ovog zakona.

(2) Oružje koje je nasljednik predao u kantonalno ministarstvo bez naknade, objavit će se po službenoj dužnosti u „Službenim novinama Federacije BiH“.

(3) Ukoliko nasljednik oružja i municije u roku 60 dana od dana pravomoćnosti rješenja o nasljeđivanju ne postupi u skladu sa članom 42. stav (3) ovog zakona, kantonalno ministarstvo oduzet će oružje i municiju i sa njima postupiti na način propisan članom 42. stav (2) ovog zakona.

## **V. ODUZIMANJE ORUŽJA, MUNICIJE I ISPRAVA O ORUŽJU**

### **Član 44.**

#### **(Oduzimanje oružja, municije i isprava o oružju)**

(1) Ako imalac oružja u roku iz člana 23. ovog zakona ne podnese zahtjev za produženje važenja isprave o oružju, dužan je predati oružje, municiju i ispravu o oružju kantonalnom ministarstvu.

(2) Ukoliko imalac oružja ne postupi u skladu sa stavom (1) ovog člana kantonalno ministarstvo će istekom roka 30 dana od dana isteka obaveze predaje za oružje, municiju i isprave o oružju po službenoj dužnosti donijeti rješenje o oduzimanju oružja, municije i isprave o oružju.

(3) Sa oduzetim oružjem i municijom postupa se u skladu sa članom 48. ovog zakona.

### **Član 45.**

### **(Razlozi za oduzimanje oružja, municije i isprava o oružju fizičkom licu)**

(1) Oružje i municija, kao i isprave iz člana 14. stav (1) tač. b), c), e) i f) ovog zakona oduzet će se od fizičkog lica ako nastupi neki od slučajeva koji bi bili u suprotnosti sa uvjetima utvrđenim u članu 16. stav (2) tač. b), c), d), e) i f), stav (3) tač. a) i c) i članu 17. st. (2) i (3) ovog zakona, kao i u slučaju iz člana 44. ovog zakona, a za pravno lice ako prestane postojati neki od uvjeta iz člana 19. ovog zakona.

(2) Oduzimanje oružja i municije iz stava (1) ovog člana vrši se rješenjem.

(3) Žalba izjavljena na to rješenje ne odgađa izvršenje rješenja.

### **Član 46.**

#### **(Vanredni zdravstveni pregled)**

(1) Fizičko lice koje je vlasnik oružja za koje postoji opravdana sumnja da više nije zdravstveno sposobno za držanje i nošenje oružja, kantonalno ministarstvo uputit će na vanredni zdravstveni pregled o čemu se donosi rješenje.

(2) Vlasnik oružja iz stava (1) ovog člana dužan je u roku 30 dana od dana prijema rješenja o upućivanju na vanredni zdravstveni pregled dostaviti kantonalnom ministarstvu uvjerenje o zdravstvenoj sposobnosti za držanje i nošenje oružja.

(3) Troškove zdravstvenog pregleda vlasnika oružja iz stava (1) ovog člana koji je proglašen zdravstveno sposobnim za držanje i nošenje oružja snosi kantonalno ministarstvo koje je uputilo to lice na vanredni zdravstveni pregled, a ako na vanrednom zdravstvenom pregledu se utvrdi da nije zdravstveno sposoban za držanje i nošenje oružja sam snosi te troškove.

### **Član 47.**

#### **(Čuvanje oduzetog oružja, municije i isprava o oružju)**

(1) Oduzeto oružje, municija i isprave o oružju na osnovu čl. 45. i 46. ovog zakona čuvaju se kod kantonalnog ministarstva kod kojeg se vodi postupak.

(2) Federalni ministar propisat će način čuvanja oružja, municije i isprava iz člana 14. stav (1) ovog zakona, kao i način postupanja sa oduzetim i predatim oružjem, municijom i ispravama, te onesposobljavanje i uništenje oružja i municije.

### **Član 48.**

#### **(Postupci sa oduzetim i predatim oružjem i municijom)**

(1) Oduzimanje oružja, municije i isprava o oružju vrši kantonalno ministarstvo.

(2) Za oduzeto oružje, municiju i isprave o oružju kantonalno ministarstvo izdat će potvrdu.

(3) Oružje i municija za koje su izdate isprave o oružju, a koje je oduzeto u upravnom postupku, njihov vlasnik može prodati ili pokloniti fizičkom ili pravnom licu koje ispunjava uvjete propisane ovim zakonom u roku tri mjeseca od pravomoćnosti rješenja o oduzimanju oružja i municije.

(4) Ako vlasnik oduzetog oružja i municije ne proda oružje i municiju u roku iz stava (1) ovog člana, kantonalno ministarstvo može predati oružje i municiju ovlaštenom trgovcu oružjem radi prodaje.

(5) Oružje i municija iz stava (2) ovog člana mogu biti izloženi na prodaji najduže tri mjeseca od dana njihove predaje ovlaštenom trgovcu oružjem.

(6) Za prodato oružje i municiju vlasniku oružja i municije pripada naknada u iznosu koji je utvrdio sa ovlaštenim trgovcem oružjem.

(7) Ako ovlašteni trgovac oružjem ne proda oružje i municiju u roku iz stava (5) ovog člana, vratit će ih kantonalnom ministarstvu u roku osam dana.

(8) Oružje i municija oduzeto u upravnom postupku koje ne bude prodato nakon šest mjeseci od pravomoćnosti rješenja o oduzimanju ili predato od državnih organa, pravnih ili fizičkih lica na prijedlog vlasnika može se predati kantonalnom ministarstvu u vlasništvo ili lično o trošku vlasnika koji će ga zadržati kao uspomenu ili će se uništiti.

(9) Bliže odredbe o onesposobljavanju i uništenju oružja i municije iz stava (8) ovog člana propisat će federalni ministar.

#### **Član 49.**

##### **(Privremeno oduzimanje oružja, municije i isprava o oružju)**

Policijski službenici mogu od lica za kojeg postoji osnovana sumnja da je izvršilo krivično djelo ili prekršaj određen ovim zakonom privremeno oduzeti oružje, municiju, dijelove oružja i isprave o oružju, kao i oružje, municiju, dijelove oružja i isprave o oružju za koje postoji osnovana sumnja da je sa njima izvršeno krivično djelo ili prekršaj, ili su pribavljeni krivičnim djelom ili prekršajem, ili su nastali izvršenjem krivičnog djela ili prekršaja, što će se bliže urediti propisom iz člana 47. stav (2) ovog zakona.

#### **Član 50.**

##### **(Postupci sa oduzetim oružjem)**

Sa oružjem i municijom oduzetom u pravomoćno okončanom prekršajnom ili krivičnom postupku postupa se u skladu sa odlukom nadležnog suda što će se bliže urediti u propisu iz člana 47. stav (2) ovog člana.

## **VI. PROMET ORUŽJA I MUNICIJE**

#### **Član 51.**

##### **(Uvjeti za obavljanje prometa oružja i municije)**

(1) Promet oružja kategorija A, B, C i D može obavljati pravno lice registrirano za promet oružja i municije u sudski registar, odnosno obrtnik registriran u registru obrtnika i koje dobije odobrenje kantonalnog ministarstva.

(2) Odobrenje iz stava (1) ovog člana izdat će se ako pravno lice ili obrtnik ispunjava sljedeće uvjete:

a) vlasnik i odgovorno lice u pravnom licu ispunjavaju uvjete iz člana 16. stav (2) tač. c), d), e) i f) ovog zakona,

b) lica koja neposredno obavljaju poslove prometa oružjem i municijom imaju navršениh 18 godina života i ispunjavaju uvjete iz člana 16. stav (2) tač. c), d), e) i f) i stav (3) tač. a) i b) ovog zakona,

c) pravno lice ima pravo vlasništva ili pravo korištenja poslovnog prostora u kojem će se obavljati promet oružja i municije,

d) prostor u kojem će se obavljati promet oružja i municije bit će uređen u skladu sa prostornim i tehničkim uvjetima za siguran smještaj i promet oružja i municije.

(3) Odobrenje iz stava (1) ovog člana prestaje važiti ukoliko pravno lice ili obrtnik ne počne sa obavljanjem djelatnosti u roku šest mjeseci od dana dobijanja odobrenja.

## **Član 52.**

### **(Nabavka oružja i municije radi prometa)**

(1) Pravno lice iz člana 51. stav (1) ovog zakona oružje i municiju radi prometa može nabavljati samo na osnovu odobrenja iz člana 14. stav (1) tač. a) i b) ovog zakona, koje važi šest mjeseci od dana izdavanja.

(2) Zahtjev za izdavanjem odobrenja iz stava (1) ovog člana podnosi se kantonalnom ministarstvu prema sjedištu podnosica zahtjeva.

(3) Odobrenje iz stava (1) ovog člana neće se izdati kada to zahtijevaju razlozi sigurnosti ili ukoliko se u toku nadzora utvrdi da podnosilac zahtjeva ne postupa u skladu sa odredbama ovog zakona ili ukoliko se utvrdi da podnosilac zahtjeva ne ispunjava uvjete navedene u članu 51. ovog zakona.

(4) Vatreno oružje koje nije ispitano i obilježeno ne može se stavljati u promet.

(5) Oblik i sadržaj obrasca zahtjeva iz stava (2) ovog člana bliže će se urediti propisom iz člana 14. stav (5) ovog zakona.

(6) Federalni ministar propisat će postupak i način obavljanja djelatnosti prometa oružja i municije, o načinu utvrđivanja uvjeta i druga pitanja koja su značajna za izdavanje odobrenja i obavljanja poslova prometa oružjem i municijom.

## **Član 53.**

### **(Obaveze pravnog lica i obrtnika)**

Pravno lice i obrtnik obavezni su obavijestiti organ iz člana 51. stav (1) ovog zakona o početku ili prestanku obavljanja odobrene djelatnosti, odnosno o drugim promjenama od značaja za izdavanje odobrenja u roku 15 dana od dana nastanka promjene.

## **Član 54.**

### **(Oduzimanje ili prestanak važenja odobrenja)**

(1) Odobrenje iz člana 51. ovog zakona oduzima se rješenjem ako pravno lice više ne ispunjava uvjete propisane ovim zakonom.

(2) Odobrenje iz stava (1) ovog člana prestaje važiti ako se djelatnost za koju je izdato odobrenje nije obavljala najmanje jednu godinu neprekidno.

**Član 55.**  
**(Prodaja oružja i municije na malo)**

(1) Pravno lice i obrtnik oružje i municiju mogu prodavati samo fizičkim i pravnim licima koja imaju odobrenje iz člana 14. stav (1) tač. a) i b) ovog zakona.

(2) Pravno lice dužno je prilikom prodaje oružja ili municije zadržati jedan primjerak odobrenja iz stava (1) ovog člana, a na drugi primjerak treba staviti i zabilješku o izvršenoj prodaji i ovjeriti štambiljom i potpisom odgovornog lica i u roku pet dana od dana prodaje o tome pisanim putem obavijestiti kantonalno ministarstvo koje je izdalo to odobrenje.

(3) Pravno lice može fizičkim licima koja imaju oružni list za lovačko oružje sa neolučenim cijevima ili odgovarajuću potvrdu za oružje kategorije C prodavati municiju na osnovu oružnog lista ili potvrde izdate za to oružje.

**VII. POPRAVLJANJE I PREPRAVLJANJE ORUŽJA I MUNICIJE**

**Član 56.**  
**(Uvjet za obavljanje djelatnosti popravljanja i prepravljanja oružja)**

(1) Popravljanjem i prepravljanjem oružja može se baviti pravno lice i obrtnik registrirani da se bave popravljanjem i prepravljanjem oružja koji za obavljanje takve djelatnosti dobiju odobrenje kantonalnog ministarstva.

(2) Odobrenje iz stava (1) ovog člana izdat će se pravnom licu i obrtniku koji ispunjava sljedeće uvjete i to:

a) popravljanje i prepravljanje oružja može obavljati samo punoljetno lice koje ispunjava uvjete iz člana 16. stav (2) tač. c), d), e) i f) i stav (3) tač. a) i b) ovog zakona,

b) pravno lice i obrtnik imaju pravo vlasništva ili pravo korištenja poslovnog prostora u kojem će se obavljati popravljanje i prepravljanje oružja,

c) prostor u kojem će se obavljati popravljanje i prepravljanje oružja bit će uređeno u skladu sa prostornim i tehničkim uvjetima za siguran smještaj i popravljanje i prepravljanje oružja.

(3) Bliže odredbe o uvjetima za obavljanje djelatnosti popravljanja i prepravljanja oružja iz stava (1) ovog člana propisat će federalni ministar.

**Član 57.**  
**(Oružje koje može biti predmet popravljanja ili prepravljanja)**

(1) Pravno lice i obrtnik iz člana 56. stav (1) ovog zakona može primiti radi popravljanja ili prepravljanja samo oružje za koje je izdata odgovarajuća isprava o oružju iz člana 14. stav (1) ovog zakona.

(2) Pravno lice i obrtnik iz stava (1) ovog člana dužno je ispitati prepravljeno oružje u skladu sa posebnim propisom kojim su uređena ta pitanja.

**Član 58.**  
**(Postupci sa oružjem primljenim na popravku ili prepravku)**

(1) Oružje koje je primljeno radi popravke ili prepravke ne smije se iznositi iz prostorija određenih za rad do njegove predaje vlasniku.

(2) Izuzetno, oružje koje je primljeno radi popravke ili prepravke smije se iznositi iz prostorija određenih za rad prije njegove predaje vlasniku radi funkcionalne probe.

(3) Pravno lice i obrtnik izdat će potvrdu o izvršenoj popravci ili prepravci oružja vlasniku oružja koji je dužan u roku osam dana obavijestiti nadležno kantonalno ministarstvo.

## **VIII. CIVILNA STRELIŠTA**

### **Član 59.**

#### **(Uvjeti za osnivanje civilnih strelišta)**

(1) Civilna strelišta za obavljanje sportske djelatnosti (u daljnjem tekstu: civilna strelišta) mogu osnovati pravna lica i obrtnik pod uvjetima utvrđenim ovim zakonom nakon što za obavljanje takve djelatnosti dobiju odobrenje kantonalnog ministarstva.

(2) Odredbe člana 51. stav (2) ovog zakona primjenjuju se na odgovarajući način i na civilna strelišta.

(3) Odredbe ovog zakona ne primjenjuju se na lovačka strelišta koja pravna lica, registrirana za obavljanje djelatnosti lova u okviru lovišta upotrebljavaju za gađanje i isprobavanje lovačkog oružja svojih članova prema propisima o lovstvu.

(4) Federalni ministar propisat će uvjete za osnivanje civilnog strelišta, način utvrđivanja uvjeta i sastav posebne komisije koja će utvrditi postojanje uvjeta za osnivanje civilnog strelišta.

### **Član 60.**

#### **(Upotreba oružja na strelištu)**

(1) Vatreno oružje na strelištu mogu koristiti fizička lica kojima je izdata odgovarajuća isprava o oružju iz člana 14. stav (1) ovog zakona.

(2) Fizičko lice koje ne ispunjava uvjete iz stava (1) ovog člana gađanje može izvoditi samo pod nadzorom ovlaštenog lica strelišta i isključivo oružjem i municijom koje je vlasništvo strelišta.

(3) Članovi sportskih streljačkih organizacija, uz predočavanje odgovarajućeg dokaza o članstvu, mogu na strelištu koristiti vatreno i zračno oružje i municiju koji su vlasništvo sportskih streljačkih organizacija, kao i oružje i municiju koji su vlasništvo strelišta.

(4) Ovlašteno lice strelišta zabranit će izvođenje gađanja i pristup licima iz st. (1) i (2) ovog člana ako njihovo ponašanje ukazuje da su pod uticajem alkohola, narkotika ili drugih omamljujućih sredstava ili ako njihovo psihofizičko stanje ukazuje na nesposobnost rukovanja oružjem.

### **Član 61.**

#### **(Nabavka oružja i municije za potrebe strelišta)**

Pravna i fizička lica iz člana 60. stav (1) ovog zakona mogu nabavljati oružje i municiju radi gađanja na strelištu na način propisan ovim zakonom.



## **IX. MEHANIČKI TRAG ORUŽJA**

### **Član 62. (Mehanički trag oružja)**

(1) Za svako vatreno oružje iz kategorije B koje se nabavlja u Federaciji radi prometa nabavljač je dužan u roku 15 dana od dana nabavke dostaviti otisak oružja (mehanički trag) Federalnom ministarstvu radi unosa otiska u propisanu evidenciju, a uzimanje otiska oružja za koji nije dostavljen mehanički trag obavlja to ministarstvo, uz naknadu koju utvrđuje Vlada Federacije na prijedlog federalnog ministra.

(2) Fizičko i pravno lice koje ima registrirano oružje dužno je omogućiti Federalnom ministarstvu uzimanje otiska oružja (mehanički trag) radi unosa otiska u evidenciju iz stava (1) ovog člana za koji se ne naplaćuje naknada.

(3) Sa oružjem fizičkih i pravnih lica kojima zbog tehničke neispravnosti nije bilo moguće uzeti otisak (mehanički trag) i koje se ne može popraviti, postupit će se u skladu sa članom 31. ovog zakona.

## **X. ŽALBA**

### **Član 63. (Izjavljivanje žalbe)**

(1) Protiv svih rješenja koja donosi kantonalno ministarstvo u skladu sa ovim zakonom može se izjaviti žalba Federalnom ministarstvu u roku 15 dana od dana prijema rješenja.

(2) Rješenje doneseno po žalbi iz stava (1) ovog člana je konačno i protiv njega se ne može voditi upravni spor.

## **XI. NADZOR NAD PRIMJENOM OVOG ZAKONA**

### **Član 64. (Upravni nadzor)**

**(1)**?? Upravni nadzor nad primjenom ovog zakona vrši Federalno ministarstvo.

### **Član 65. (Inspekcijski nadzor)**

(1) Inspekcijski nadzor vrši Federalno ministarstvo i kantonalno ministarstvo.

(2) Federalno ministarstvo vrši inspekcijski nadzor u kantonalnim ministarstvima u odnosu na pitanja koja se rješavaju u upravnom postupku i donosi rješenja i druga akata iz nadležnosti kantonalnog ministarstva utvrđena ovim zakonom.

### **Član 66. (Inspekcijski nadzor iz nadležnosti kantonalnog ministarstva)**

Kantonalno ministarstvo vrši inspekcijski nadzor koji se odnosi na nadzor nad prometom, držanjem i nošenjem oružja i municije, čuvanjem i smještajem oružja i municije

od pravnih lica i obrtnika koja se bave prometom oružja i municije, sportskih streljačkih organizacija, organizacija koje gazduju lovištem, državnih organa i ustanova, agencija za zaštitu ljudi i imovine, unutrašnjih službi zaštite i pravnih lica i obrtnika koji se bave popravljanjem i prepravljanjem oružja i drugih subjekata koji se bave poslovima utvrđenim ovim zakonom, kao i nadzor nad vođenjem evidencija o:

- a) nabavljenom oružju i municiji,
- b) prometu oružja i municije,
- c) popravljaju i prepravljaju oružja i municije,
- d) oružju i municiji datom na poslugu i
- e) oružju i municiji datom na čuvanje.

### **Član 67.**

#### **(Ovlaštenja lica koje vrši neposredni nadzor)**

(1) U vršenju nadzora iz člana 66. ovog zakona ovlašteno lice nadležnog kantonalnog ministarstva ovlašteno je:

a) pregledati skladišta oružja i municije, civilna strelišta i druge prostorije gdje se vrši promet, popravlja, prepravlja i čuva oružje i municija, vrši pregled propisanih evidencija i ostale dokumentacije u vezi sa prometom, popravljanjem i prepravljanjem ili čuvanjem oružja i municije i vođenjem civilnih strelišta,

b) privremeno zabraniti obavljanje djelatnosti prometa i popravljanja ili prepravljanja oružja i municije, upotrebu civilnih strelišta i narediti da se utvrđene nepravilnosti otklone u određenom roku,

c) zabraniti daljnje bavljenje prometom, popravljanjem ili prepravljanjem oružja i municije, odnosno upotrebu civilnih strelišta ako utvrdi da su u obavljanju tih djelatnosti učinjeni teži propusti u poduzimanju zaštitnih ili drugih sigurnosnih mjera ili druge teže kažnjive radnje, ukoliko je prestao postojati neki od uvjeta pod kojima je odobrenje izdato ili ako se ne postupi po nalogu nadležnog kantonalnog ministarstva,

d) narediti poduzimanje i drugih propisanih mjera.

(2) Mjere iz stava (1) ovog člana naređuju se rješenjem.

(3) Federalni ministar propisat će sadržaj i način vršenja inspekcijskog nadzora iz stava (1) ovog člana.

## **XII. STRUČNA OBUKA**

### **Član 68.**

Stručnu obuku iz člana 16. stav (3) tačka b) ovog zakona vrši kantonalno ministarstvo i Federalno ministarstvo u skladu sa propisom iz člana 74. stav (1) tačka b) ovog zakona.

## **XIII. EVIDENCIJE**

### **Član 69.**

#### **(Evidencije koje vodi kantonalno ministarstvo)**

(1) Kantonalno ministarstvo vodi sljedeće evidencije:

- a) za izdata odobrenja za nabavku oružja,
- b) za izdata odobrenja za nabavku municije,

- c) za izdata odobrenja za držanje oružja,
- d) za izdata odobrenja za sakupljanje starog i držanje trofejnog oružja,
- e) za izdate oružne listove za držanje oružja,
- f) za izdate oružne listove za držanje i nošenje oružja,
- g) za izdate potvrde o prijavi oružja kategorije C,
- h) za oduzeto, nađeno i predato oružje i municiju,
- i) za izdata odobrenja za popravljnje i prepravljnje oružja,
- j) za izdata odobrenja za promet oružja i municije,
- k) za izdato odobrenje za osnivanje i vođenje civilnih strelišta,
- l) za izdate potvrde o osposobljavanju fizičkih lica za pravilno rukovanje, držanje i nošenje vatrenog oružja, o oduzetom, nađenom i predatom oružju i municiji.

(2) Lični podaci sadržani u evidencijama iz stava (1) ovog člana prikupljaju se, obrađuju i pohranjuju u skladu sa Zakonom o zaštiti ličnih podataka ("Službeni glasnik BiH", br. 46/06).

(3) Evidencije iz stava (1) ovog člana vode se u pisanom i elektronskom obliku.

(4) Sadržaj, način vođenja, zaštita i čuvanje podataka u evidencijama iz stava (1) ovog člana, kao i način dostave tih podataka Federalnom ministarstvu za potrebe Centralne evidencije i evidencije o uzetom otisku (mehanički trag) propisuje federalni ministar.

## **Član 70.**

### **(Evidencije koje vode pravna lica, obrtnici i fizička lica)**

(1) Sportske streljačke organizacije i druga pravna lica registrirana za obavljanje djelatnosti lova, kao i pravna lica koja su oružje i municiju nabavila i registrirala radi obavljanja svoje djelatnosti, dužna su o tom oružju i municiji, te o oružju i municiji koju daju na korištenje voditi evidenciju.

(2) Pravna lica iz stava (1) ovog člana dužna su voditi sljedeće evidencije i to za:

- a) oružje i municiji nabavljenu na osnovu odobrenja nadležnog kantonalnog ministarstva,
- b) oružje i municiju koju daju na korištenje drugim ovlaštenim pravnim licima.

(3) Pravno lice i obrtnik ovlašteni za promet oružja i municije dužni su voditi sljedeću evidenciju i to: evidencije o nabavljenom i prodatom oružju i municiji, te o oružju i municiji primljenom na čuvanje ili radi prodaje.

(4) Pravno lice i obrtnik ovlašteni za popravljnje i prepravljnje oružja dužni su voditi evidencije o popravljnom i prepravljnom oružju.

(5) Pravno lice i obrtnik ovlašteni za vođenje civilnih strelišta dužni su voditi evidencije o nabavljenom oružju i municiji, o oružju i municiji ustupljenom na korištenje, te o utrošenoj municiji.

(6) Pravno i fizičko lice kojima je izdato odobrenje za sakupljanje starog i trofejnog oružja dužni su voditi evidenciju o sakupljenom i trofejnom oružju.

(7) Evidencije iz st. od (1) do (6) ovog člana čuvaju se trajno, a u slučaju smrti fizičkog lica, odnosno prestanka postojanja pravnog lica ili obrta evidencije se predaju nadležnom kantonalnom ministarstvu.

(8) Propisom iz člana 69. stav (4) ovog zakona utvrđuje se i sadržaj i način vođenja evidencija iz stava (1) ovog člana koji propisuje federalni ministar.

#### **Član 71. (Evidencija koju vodi Federalno ministarstvo)**

(1) Federalno ministarstvo vodi Centranu evidenciju koju čine podaci iz svih evidencija iz člana 69. ovog zakona.

(2) Evidencija iz stava (1) ovog člana vodi se u elektronskom obliku.

(3) Kantonalna ministarstva dužna su sve podatke iz evidencija koje vodi prema članu 69. ovog zakona dostavljati Federalnom ministarstvu elektronskim putem u roku pet dana od dana upisa podatka u evidenciju, kao i sve promjene koje se izvrše u tim evidencijama.

### **XIV. PRIJAVA NELEGALNOG ORUŽJA**

#### **Član 72. (Prijava nelegalnog oružja)**

(1) Fizička lica koja nelegalno posjeduju oružje dužna su takvo oružje prijaviti kantonalnom ministarstvu radi predaje ili onesposobljavanja, odnosno uništavanja.

(2) Policijski službenici preuzet će oružje i municiju iz stava (1) ovog člana na mjestu na kojem se ono nalazi i o preuzetom oružju i municiji izdati potvrdu.

(3) Ako fizičko lice postupi u skladu sa stavom (1) ovog člana, a prije istražnih radnji policije u skladu sa Zakonom o prekršajima i započinjanju istrage krivičnih djela, te hitnih istražnih radnji u skladu sa Zakonom o krivičnom postupku, odnosno početkom primjene policijskih ovlaštenja utvrđenih Zakonom o policijskim službenicima, neće se pokretati prekršajni niti krivični postupak.

### **XV. EVROPSKI ORUŽNI LIST**

#### **Član 73. (Sadržaj evropskog oružnog lista)**

(1) U skladu sa Direktivom Vijeća 91/477/EEZ od 18. jula 1991. godine o kontroli nabavljanja i držanja oružja (SL. L. 256, 03.09.1991.) i Direktivom 2008/51/EZ Evropskog parlamenta i Vijeća od 21. maja 2008. godine kojom se izmjenjuje i dopunjuje Direktiva Vijeća 91/477/EEZ o kontroli nabavljanja i držanja oružja (SL L 179, 08.07.2008.), izdaje se evropski oružni list kojim se potvrđuje da lice na koje glasi zakonito posjeduje i upotrebljava vatreno oružje.

(2) Evropski oružni list izdaje se na period do pet godina, s tim da se može produžiti ako se odnosi na podatke iz kategorije D do 10 godina.

(3) Evropski oružni list sadrži podatke navedene u Prilogu II. Direktive iz stava (1) ovog člana i nije prenosiv. U evropski oružni list zapisuje se vatreno oružje koje posjeduje, koristi nosilac lista.

(4) Evropski oružni list uvijek mora biti u posjedu lica koje koristi vatreno oružje i svaka promjena povezana sa posjedovanjem ili promjenama vatrenog oružja, kao i njegov gubitak ili krađa moraju biti naznačeni.

(5) Državljeni članica Evropske unije smiju u Federaciju unijeti oružje koje je upisano u evropski oružni list, ako je njegovo unošenje odobrilo Federalno ministarstvo.

## **XVI. OVLAŠTENJE ZA DONOŠENJE PODZAKONSKIH PROPISA**

### **Član 74. (Provedbeni propisi)**

(1) Federalni ministar će donijeti sljedeće propise:

- a) o izgledu i sadržaju obrazaca odobrenja iz člana 14. ovog zakona (član 14. stav (5));
- b) o načinu, postupanju i dokazima za utvrđivanje uvjeta iz člana 16. ovog zakona i izdavanja odobrenja iz člana 14. stav (1) tačka a) ovog zakona, te druga pitanja koja se odnose na izdavanje odobrenja, kao i program i način poviđenja stručnog i tehničkog znanja iz člana 16. stav (3) tačka b) ovog zakona (član 17. stav (3));
- c) o uvjetima za siguran smještaj i čuvanje oružja i municije i način pregleda oružja i municije (član 30. stav (4));
- d) o načinu čuvanja oružja, municije i isprava iz člana 14. stav (1) ovog zakona, kao i načinu postupanja sa oduzetim i predatim oružjem, municijom i ispravama, te onesposobljavanje i uništenje oružja i municije (član 47. stav (2));
- e) o onesposobljavanju i uništenju oružja i municije (član 48. stav (9));
- f) o postupanju i načinu obavljanja djelatnosti prometa oružja i municije, načinu utvrđivanja uvjeta i druga pitanja koja su značajna za izdavanje odobrenja i obavljanje poslova prometa oružjem i municijom (član 52. stav (6));
- g) o uvjetima i načinu i postupanju za obavljanje djelatnosti popravljavanja i prepravljavanja oružja (član 56. stav (3));
- h) o uvjetima za osnivanje civilnog strelišta, načinu utvrđivanja uvjeta i sastavu posebne komisije koja će utvrditi postojanje uvjeta za osnivanje civilnog strelišta (član 59. stav (4));
- i) o sadržaju i načinu vršenja inspekcijskog nadzora (član 67. stav (3)); i
- j) o sadržaju, načinu vođenja, zaštiti i čuvanju podataka u evidencijama, kao i načinu dostavljanja tih podataka Federalnom ministarstvu za potrebe Centralne evidencije i evidencije o uzetom otisku (mehanički trag) (član 69. stav (4)).

(2) Propisi iz stava (1) ovog člana donijet će se u roku šest mjeseci od dana stupanja na snagu ovog zakona.

(3) Federalni ministar zdravstva u saradnji sa federalnim ministrom unutrašnjih poslova donijet će propis o uvjetima koje moraju ispunjavati zdravstvene ustanove koje obavljaju zdravstvene preglede za utvrđivanje zdravstvene sposobnosti lica za držanje i nošenje oružja i municije (član 18. stav (4)).

(4) U izradi propisa iz stava (1) ovog člana obavezno učestvuju predstavnici svih kantonalnim ministarstava i predstavnici Federalne uprave policije o čemu se brine Federalno ministarstvo.

## **XVII. KAZNE NE ODREDBE**

### **Član 75.**

#### **(Kazne zatvora za krivično djelo)**

(1) Kaznom zatvora do dvije godine bit će kažnjeno fizičko lice, odgovorno lice u pravnom licu i obrtnik za krivično djelo ako:

a) bez važećeg odobrenja za nabavku oružja nabavi, proda, drži ili nosi oružje kategorije B (čl. 11., 16., 19. i 52.),

b) bez važeće isprave o oružju nabavi, drži ili nosi bitne dijelove za oružje kategorije B (čl. 7., 11., 16., 19. i 52.).

(2) Za krivična djela iz stava (1) ovog člana obavezno se izriče i zaštitna mjera oduzimanja oružja i bitnih dijelova za oružje.

(3) Za krivično djelo iz stava (1) ovog člana obrtniku se obavezno izriče sigurnosna mjera zabrane obavljanja djelatnosti prodaje i prometa oružja i municije.

### **Član 76.**

#### **(Novčana kazna i kazna zatvora za krivično djelo)**

(1) Novčanom kaznom u iznosu od 2.000,00 KM do 15.000,00 KM ili kaznom zatvora do jedne godine bit će kažnjeno fizičko lice, odgovorno lice u pravnom licu i obrtnik za krivično djelo ako:

a) bez važeće isprave o oružju nabavi, drži ili nosi municiju za oružje kategorije B (čl. 11., 25. i 52.),

b) proda, pokloni ili preda oružje kategorije B fizičkom i pravnom licu koje nema važeću ispravu o oružju (član 28. stav (1) i član 55. stav (1) ovog zakona),

c) proda, pokloni ili preda bitne dijelove za oružje kategorije B fizičkom i pravnom licu koje nema važeću ispravu o oružju (član 28. stav (1) i član 55. stav (1) ovog zakona),

d) proda, pokloni ili preda municiju za oružje kategorije B fizičkom ili pravnom licu koje nema važeću ispravu o oružju (član 28. stav (2) i član 55. stav (1) ovog zakona),

e) postupi suprotno odredbama člana 34. ovog zakona.

(2) Za krivična djela iz stava (1) ovog člana obavezno se izriče i zaštitna mjera oduzimanja oružja, bitnih dijelova za oružje i municiju.

(3) U izvršenju zaštitne mjere iz stava (2) ovog člana za krivično djelo iz stava (1) ovog člana oduzima se i isprava o oružju.

(4) Za krivično djelo iz stava (1) obrtniku se obavezno izriče sigurnosna mjera zabrane obavljanja djelatnosti.

**Član 77.**  
**(Novčana kazna za pravno lice)**

(1) Novčanom kaznom u iznosu od 15.000,00 KM do 50.000,00 KM bit će kažnjeno pravno lice za krivično djelo koje suprotno odredbama (član 52.) ovog zakona nabavi, drži ili proda oružje i municiju.

(2) Za krivično djelo iz stava (1) ovog člana uz novčanu kaznu izriče se sigurnosna mjera zabrane obavljanja djelatnosti i oduzimanja oružja i municije.

**Član 78.**  
**(Novčane kazne i zaštitne mjere za prekršaje fizičkih lica)**

(1) Novčanom kaznom u iznosu od 500,00 KM do 1.500,00 KM bit će kažnjeno za prekršaj fizičko lice koje:

a) u propisanom roku ne prijavi oružje kategorije C (član 12. stav (1) tačka c), član 27. stav (2) ovog zakona), koje drži ili nosi oružje kategorije C bez odgovarajuće isprave (član 12. stav (4)), odnosno koje nabavi, drži ili nosi oružje kategorije D suprotno odredbi člana 12. stav (5) ovog zakona,

b) skuplja staro i trofejno oružje bez važeće isprave o oružju (član 26. stav (1)), ili koje upotrebljava staro oružje i trofejno oružje kao oružje ili nabavlja, spravlja i drži municiju za ovo oružje (član 26. stav (5)), ili koje proda ili preda staro i trofejno oružje licu koje nema važeću ispravu o oružju ili ko ne postupi u propisanom roku (član 26. stav (7)),

c) osposobi za upotrebu vatreno oružje koje je bilo onesposobljeno (član 26. stav 8)),

d) proda oružje kategorije C fizičkom licu mlađem od 18 godina (član 27. stav (1)),

e) postupi suprotno odredbama člana 29. st. (1), (3), (4) i (7) ovog zakona,

f) postupi suprotno odredbama člana 30. ovog zakona,

g) postupi suprotno odredbama člana 33. st. (5), (6), (8) i (9) ovog zakona.

(2) Za prekršaje iz stava (1) ovog člana obavezno se izriče i zaštitna mjera oduzimanja oružja i bitnih dijelova za oružje i municiju.

(3) U izvršenju zaštitne mjere iz stava (2) ovog člana oduzima se isprava o oružju.

**Član 79.**  
**(Novčane kazne i zaštitne mjere za fizička lica)**

(1) Novčanom kaznom u iznosu od 300,00 KM do 1.000,00 KM bit će kažnjeno za prekršaj fizičko lice koje:

a) ne dopusti policijskom službeniku da utvrdi postojanje uvjeta za siguran smještaj i čuvanje oružja koji će se utvrditi u propisu iz člana 17. stav (4) ovog zakona,

b) odmah po saznanju ne obavijesti nadležni organ o promjeni zdravstvenog stanja imaoca oružja, a koje može uticati na sposobnost za držanje i nošenje oružje (član 18.),

c) u propisanom roku ne vrati odobrenje za nabavku oružja (član 21. stav (2)),

č) u propisanom roku ne podnese pisani zahtjev za registraciju oružja i izdavanje oružnog lista, odnosno odobrenja za držanje nadležnom policijskom organu (član 23. stav (1)),

ć) u propisanom roku ne vrati odobrenje za nabavku municije (član 25. stav (4)),

d) postupi suprotno odredbama člana 28. ovog zakona,

dž) postupi suprotno odredbama člana 29. ovog zakona;

đ) postupi suprotno odredbama člana 31. stav (1) ovog zakona,

- e) postupi suprotno odredbama člana 32. st. (1) i (2) ovog zakona,
  - f) je član streljačke organizacije koji nosi oružje van strelišta ili drugog terena određenog za vršenje vježbi gađanja, odnosno takmičenja u gađanju bez potvrde streljačke organizacije o vršenju vježbi gađanja, odnosno takmičenja u gađanju (član 35. stav (2)),
  - g) ne vrati oružje organizaciji koja gazduje lovištem, odnosno neutrošenu količinu municije dobijenu na poslugu u određenom roku ili ih upotrebljava, odnosno iznosi van određenog lovišta (član 36.),
  - h) nosi oružje i municiju koji su mu povjereni u vrijeme kada ne vrši službu, ili iznese oružje i municiju van područja, odnosno objekta koji se osigurava ili čuva (član 37. stav (2)),
  - i) u propisanom roku ne prijavi nestanak oružja ili municije koju drži na osnovu važeće isprave o oružju (član 39. stav (1)),
  - j) u propisanom roku ne prijavi promjenu ličnog imena ili prebivališta (član 41.),
  - k) postupi suprotno odredbama člana 42. ovog zakona;
  - l) je imalac oružja i koji nakon isteka roka važenja isprave o oružju, a koji nije podnio zahtjev za produženje važenja isprave o oružju, ne preda oružje, municiju i ispravu o oružju nadležnom policijskom organu (član 44.),
  - lj) imalac oružja koji neomogućiti Federalnom ministarstvu uzimanje otiska oružja (mehanički trag) radi unosa otiska u propisanu evidenciju (62.),
  - m) ne vodi propisanu evidenciju (član 70.).
- (2) Za prekršaje iz stava (1) tač. č), d), đ), e), j), k), l), lj) i m) ovog člana, obavezno se izriče i zaštitna mjera oduzimanja oružja i municije.

(3) U izvršenju zaštitne mjere iz stava (2) ovog člana oduzima se i isprava o oružju.

## **Član 80.**

### **(Novčane kazne i zaštitne mjere za prekršaje pravnih lica, odgovornih lica u pravnom licu i obrtnika)**

- (1) Novčanom kaznom u iznosu od 5.000,00 KM do 15.000,00 KM bit će kažnjeno za prekršaj pravno lice:
- a) svaka zdravstvena ustanova koja izda uvjerenje o zdravstvenoj sposobnosti za držanje i nošenje oružja suprotno propisu iz člana 18. stav (3) ovog zakona ili
  - b) koja ne obavijesti nadležni organ o promjeni zdravstvenog stanja imaoaca oružja, a koje može uticati na sposobnost za držanje i nošenje oružja (član 18. st. (1) i (2)),
  - c) koje u propisanom roku ne vrati odobrenje za nabavku oružja (član 21. stav (2)),
  - č) koje u propisanom roku ne podnese pisani zahtjev nadležnom kantonalnom ministarstvu za registraciju oružja (član 23. stav (1)),
  - ć) koje postupi suprotno odredbama člana 26. ovog zakona,
  - d) koje postupi suprotno odredbama člana 27. ovog zakona,
  - dž) koje postupi suprotno odredbama člana 28. ovog zakona,
  - đ) koje ne drži ili ne čuva oružje i municiju na propisan način, odnosno ne donese oružje na pregled po pozivu nadležnog kantonalnog ministarstva (član 30.),
  - e) koje ne preda oružje koje je dotrajalo u tolikoj mjeri da njegova upotreba može ugroziti sigurnost ljudi, a ne može se popraviti ili prepraviti ili ne preda zamijenjene tehnički neispravne dijelove oružja (član 31. st. (1) i (3)),
  - f) koje postupi suprotno odredbama člana 33. st. (6), (7) i (8)) ovog zakona,
  - g) koje postupi suprotno odredbama člana 34. stav (2) ovog zakona,
  - h) koje postupi suprotno odredbama člana 35. ovog zakona,
  - i) koje postupi suprotno odredbama člana 36. st. (1) i (2) ovog zakona,



j) koje povjeri nošenje oružja i municije licu koje nije određeno da neposredno obavlja poslove zaštite i koje ne ispunjava uvjete za nošenje oružja propisane ovim zakonom (član 37. stav (1)) ili ko naredi ili dozvoli da lice kome je povjereno oružje radi obavljanje poslova zaštite nosi to oružje suprotno odredbama člana 37. st. (2) i (3), odnosno ko ne izda potvrdu i ne obavijesti nadležni policijski organ o licu kojem je povjereno oružje (član 37. stav (4)),

k) koje ne obavijesti u propisanom roku nadležni policijski organ o prestanku potrebe za daljnjim držanjem oružja i municije (član 38. stav (1)),

l) koje ne prijavi u propisanom roku nestanak oružja ili municije koje drži na osnovu važeće isprave o oružju (član 39. stav (1)) ili ne prijavi nestanak isprava o oružju u propisanom roku (član 39. stav (2));

lj) koje u propisanom roku ne prijavi promjenu sjedišta ili naziva (član 41.),

m) koje ne vrati oružje ili municiju nadležnom organu u propisanom roku (član 48. stav (7));

n) koje se bavi prometom oružja i municije suprotno odredbama člana 51. ovog zakona,

nj) koje u propisanom roku ne obavijesti nadležni policijski organ o početku ili prestanku obavljanja odobrene djelatnosti, odnosno o drugim promjenama od značaja za izdavanje odobrenja (član 53.),

o) koje postupi suprotno odredbama člana 55. st. (2) i (3) ovog zakona,

p) koje se bavi popravljanjem ili prepravljanjem oružja suprotno odredbama člana 56. ovog zakona,

r) koje postupi suprotno odredbama člana 57. ovog zakona,

s) koje postupi suprotno odredbama člana 58. stav (1) ovog zakona,

š) koje bez odobrenja pusti u rad civilno streljište (član 59. stav (1)),

t) koje dopusti upotrebu oružja na streljištu suprotno odredbama člana 60. ovog zakona,

u) koje ne dostavi otisak oružja (mehanički trag) Federalnom ministarstvu unutrašnjih poslova radi unosa otiska u propisanu evidenciju (član 62. stav (1)),

v) koje ne omogući Federalnom ministarstvu unutrašnjih poslova uzimanje otisaka oružja (mehanički trag) radi unosa otiska u propisanu evidenciju (član 62. stav (1)),

z) koje postupi suprotno odredbama člana 69. ovog zakona.

(2) Za prekršaje iz stava (1) tač. č), ć), d), dž), đ), e), f), g), h), i), j), k), l), lj), n), nj), r) i t) ovog člana izriče se i zaštitna mjera oduzimanja oružja i municije.

(3) Za prekršaje iz stava (1) ovog člana bit će kažnjeno novčanom kaznom u iznosu od 500,00 KM do 1.500,00 KM odgovorno lice u pravnom licu i obrtnik.

(4) Za prekršaje iz stava (1) ovog člana, uz novčanu kaznu može se izreći i zaštitna mjera zabrane obavljanja djelatnosti prometa, popravljanja i prepravljanja oružja ili vođenje civilnog streljišta u trajanju od šest do 12 mjeseci, odnosno kod višestrukih povratnika i trajno.

## **Član 81.**

### **(Oduzimanje oružja u slučaju vođenja krivičnog ili prekršajnog postupka)**

(1) Za krivična djela iz čl. 73. i 74. te prekršaje iz čl. 75., 76., 77. i 78. ovog zakona oružje i municija oduzet će se i u slučaju da se postupak okonča presudom, odnosno rješenjem kojim se okrivljeni ne proglašuje krivim, ako to zahtijevaju interesi javne ili opće sigurnosti.

(2) Nadležni sud kod kojeg je postupak okončan donosi posebno rješenje o oduzimanju oružja i municije iz stava (1) ovog člana.

(3) Po okončanju postupaka provedenih po odredbama čl. 75, 76., 77., 78., 79. i 80. ovog zakona oduzeto oružje i municija predaju se Ministarstvu.

## **XVIII. TROŠKOVI I NOVČANE KAZNE**

### **Član 82.**

#### **(Troškovi i novčane kazne iz nadležnosti kantonalnog ministarstva)**

(1) Kantonalno ministarstvo osigurava novčana sredstva za potrebe izrade obrazaca i drugih akata, rad komisija, vođenje evidencija i druge troškove za obavljanje poslova predviđenih ovim zakonom u budžetu kantona u okviru sredstava za rad kantonalnog ministarstva.

(2) Vlada kantona na prijedlog kantonalnog ministarstva utvrđuje cijene za obrasce i druge akte, odnosno isprave predviđene ovim zakonom i način uplate tih sredstava.

(3) Kantonalne administrativne takse, cijene obrazaca iz stava (2) ovog člana, novčane kazne izrečene za prekršaj i krivična djela iz čl. od 75 do 81. ovog zakona, kao i drugi troškovi koji nastaju prema ovom zakonu, predstavljaju prihod budžeta kantona koje plaćaju fizička i pravna lica, odnosno obrtnici kada podnose zahtjev za ostvarivanje prava prema ovom zakonu ili izvršavanje obaveza utvrđenih ovim zakonom.

### **Član 83.**

#### **(Troškovi iz nadležnosti Federalnog ministarstva)**

Federalne administrativne takse koje se odnose na žalbe izjavljene na rješenja iz člana 62. ovog zakona, kao i troškovi izdavanja podataka iz Centralne evidencije iz člana 70. ovog zakona predstavljaju prihod budžeta Federacije.

## **XIX. PRIJELAZNE I ZAVRŠNE ODREDBE**

### **Član 84.**

#### **(Zamjena isprava o oružju)**

(1) Isprave o oružju izdate po dosada važećim zakonima, bez obzira na datum njihovog izdavanja važit će do isteka roka za koji su izdate.

(2) Isprave o oružju izdate po do sada važećim zakonima, bez obzira na datum njihovog izdavanja a koje nemaju ograničen rok važenja, zamjenit će se u roku dvije godine od dana stupanja na snagu ovog zakona.

(3) Istekom roka iz stava (2) ovog člana imaoći tih isprava dužni su podnijeti zahtjev za izdavanje nove isprave o oružju.

(4) Lice koje ne postupi u skladu sa stavom (3) ovog člana primijenit će se odredbe čl. 44. i 48. ovog zakona.

**Član 85.**  
**(Obaveza prijave oružja kategorije C)**

Fizička lica koja posjeduju oružje koje se prema odredbama ovog zakona može nabavljati bez odobrenja, a za koje je potrebna prijava kantonalnom ministarstvu, dužna su takvo oružje prijaviti tom nadležnom ministarstvu u roku 30 dana od dana stupanja na snagu ovog zakona.

**Član 86.**  
**(Usklađivanje obavljanja djelatnosti)**

Pravno lice ili obrtnik koji na dan stupanja na snagu ovog zakona obavlja djelatnost prometa oružja i municije, popravljanja i prepravljanja oružja i municije ili vođenje civilnih strelišta dužan je svoje poslovanje uskladiti sa odredbama ovog zakona u roku šest mjeseci od dana stupanja na snagu ovog zakona.

**Član 87.**  
**(Primjena podzakonskih akata)**

Podzakonski akti doneseni na osnovu kantonalnih zakona o nabavljanju, držanju i nošenju oružja i municije primjenjivat će se do donošenja podzakonskih akata na osnovu ovog zakona, prema roku utvrđenom u članu 74. stav (2) ovog zakona.

**Član 88.**  
**(Prestanak važenja)**

Danom stupanja na snagu ovog zakona prestaje primjena kantonalnih zakona o nabavljanju, držanju i nošenju oružja i municije sa područja Federacije.

**Član 89.**  
**(Stupanje na snagu)**

Ovaj zakon stupa na snagu osmog dana od dana objavljivanja ovog zakona u "Službenim novinama Federacije BiH".

# O B R A Z L O Ž E N J E

## I - USTAVNI OSNOV ZA DONOŠENJE ZAKONA

Ustavni osnov za donošenje Zakona o nabavljanju, držanju i nošenju oružja i municije nije izričito navedene ali za njegovo donošenje mogu biti osnov odredbe Glave III član 1. tačka c) Ustava Federacije Bosne i Hercegovine, a u vezi sa Glavom II član 2. (1) a) tog ustava. Prema Glavi II. A. člana 2. stav 1. Ustava Federacije Bosne i Hercegovine predviđeno je da će Federacija osigurati primjenu najvišeg nivoa međunarodno priznatih prava i sloboda utvrđenih u dokumentima navedenim u Aneksu ovog ustava, a posebno prava i slobode utvrđene u članu 2. te ustavne odredbe. Polazeći od činjenice da su u isključivoj nadležnosti Federacije Bosne i Hercegovine pitanja koja se odnose na organizovani kriminal, međukantonalni kriminal, terorizam i suzbijanje trgovine drogama, kod kojih upotreba oružja ima značajnu ulogu koja se provodi i to kao sredstvo izvršenje krivičnog djela u kojima su često ugroženi životi ljudi (ubistva, ranjavanje i sl.), kao i sama pojava jednog krivičnog djela – kod organizovanog kriminala (krijumčarenje oružjem je jedan od oblika organizovanog kriminala – gdje postoje grupe koje se bave krijumčarenjem oružja), proizilazi da navedene ustavne odredbe mogu biti ustavni osnov za donošenje federalnog Zakona o nabavljanju, nošenju i držanju oružja. To znači da se ustavni osnov nalazi u navedene dvije ustavne odredbe Ustava Federacije Bosne i Hercegovine, od čega se jedna odnosi na korištenje oružja u vršenju krivičnih djela organizovanog kriminala, terorizma i drugih krivičnih djela u kojima se ugrožava život ljudi, a druga odredba se odnosi na obavezu Federacije da osigura najveći stepen zaštite prava i sloboda građana, a jedno od tih prava jeste pravo na život odnosno zaštiti života građana. (Glava II. A. član 2. stav 2. (a) Ustava Federacije Bosne i Hercegovine). Tu obavezu Federacija osigurava time što svojim zakonom uređuje sve potrebne i jedinstvene uvjete za područje cijele Federacije Bosne i Hercegovine, jer se oružjem ugrožava život građana, a nabavka oružja bi se vršila pod jedinstvenim uvjetima koji bi bili restriktivni.

## II- RAZLOZI ZA DONOŠENJE ZAKONA

Komisija za sigurnost Doma naroda Parlamenta Federacije Bosne i Hercegovine je razmatrala Informaciju o inicijativi za donošenje Zakona o držanju i nošenju oružja na nivou Federacije BiH koju je sačinilo Federalno ministarstvo unutrašnjih poslova, te je donijela zaključak da Parlamentu Federacije predloži zakon kojim bi na jedinstven način u Federaciji Bosne i Hercegovine (u daljnjem tekstu: Federacija) bilo uređeno pitanje nabavljanje, držanje i nošenje oružja.

Oblast nabavljanja, nošenja i držanja oružja u Federaciji regulisana je kantonalnim propisima. Trenutno u Federaciji svaki kanton ima svoj propis koji na području svog kantona uređuje pitanje nabavljanja, nošenja i držanja oružja, što znači da u Federaciji ima 10 zakona kojima se regulišu pitanje nabavke, nošenja i držanja oružja.

Upoređivanjem kantonalnih zakona (Zakon o nabavljanju, držanju i nošenju oružja i municije Bosansko-Podrinškog kantona Goražde, Zakon o oružju Županije Zapadno Hercegovačke, Zakon o nabavljanju i držanju i nošenju oružja i municije ZDK, Zakon o nabavljanju i držanju i nošenju oružja i municije Tuzanski kanton i Zakon o oružju i municiji USK) koji regulišu pitanje nošenja i držanja oružja i utvrdilo sljedeće:

- da navedeni propisi nisu u cijelosti harmonizovani;
- da postoje različita rješenja po pitanju roka važenja oružanog lista;
- da postoje različite brojke po pitanju koliko oružja može da ima fizičko lice na jedan oružni list;
- da u nekim pitanjima kojima se odlučuje po zahtjevu stranaka nije obezbjeđeno pravo na pokrenutanje upravnog spora;
- da nisu isti uvjeti za nabavku oružja fizičkog lica (u USK kantonu uvjet je da ima 18 godina, a u drugim kantonima 21. godinu)

- da su u nekim kantonalnim zakonima utvrđena krivična djela i prekršaji za nelegalno držanje oružja, a u drugim samo prekršaji;
- da nisu usklađeni sa Direktivom Evropske unije 91/477/EEZ o kontroli nabavke i posjedovanja oružja sa preporukama od 18.06.1991. godine sa izmjenama i dopunama od 21.05.2008. godine (2008/51/EZ);
- i druga različita pitanja.

Ovdje naročito treba ukazati da ni jedan gore navedeni Zakon nije preuzeo kategorizaciju oružja kako je to definisano u Direktivi 91/477/EEZ (kategorizacija oružja na grupe A, B, C i D), niti je izvršena harmonizaciji postojećih zakonskih rješenja.

Prvenstveno nije izvršena harmonizacija propisa u pogledu međunarodnih standardima u ovoj oblasti, evropskom Direktivom 91/477/EEZ i njenim izmjenama 2008/51/EC, te UN Protokolom protiv nezakonite proizvodnje i krijumčarenja oružja, njegovih sastavnih dijelova, te dijelova i municije, kojima se dopunjuje UN Konvencija protiv transnacionalnog organizovanog kriminala.

Razlozi za harmonizaciju propisa iz oblasti nabavke, držanja i nošenja oružja sa zakonodavstvom EU (gore navedenim direktivama i protokolom) sadržani su i u potrebi jačanja borbe protiv nelegalne trgovine oružjem namijenjenog za civilnu upotrebu kao i unaprjeđenje sigurnosne politike u cjelini, a što su poslovi iz isključive nadležnosti Federacije.

Također, postojeća zakonska regulativa (kantonalni zakoni o oružju) ne tretiraju ni uspostavljanje centralne baze podataka registrovanog SALW-a u posjedu civila ili funkcionalnih baza podataka u svim institucijama za provođenje zakona, koje bi omogućile brz i neometan pristup informacijama od strane nadležnih tijela za sprovođenje zakona. Ovo je jedno od najvažnijih pitanja koje kantonalnim Zakonima o oružju nije uređeno.

Kantonalnim zakonima nije uređeno jedno od glavnih pitanja koje se odnosi na neposrednu sigurnost građana, a to je pitanje ispitivanja, obilježavanja žigom i provjere tehničke ispravnosti oružja. Prema istraživanjima koja su obavljena u Federaciji ukupan broj registrovanog oružja iznosi 146.542 komada.

Ispitivanjem, obilježavanjem žigom i provjere tehničke ispravnosti oružja prije svega treba da iz pravnog prometa isključi ono oružje koje ne ispuni uvjete o ispitivanju oružja, a da se pri tome ne povrijedi ustavno pravo građana na posjedovanje stvari. Ovim se želi uvesti red po pitanju tehničke ispravnosti oružja, gdje bi se uveo novi institut tzv. «tehničkih pregleda». Paralelu možemo povući s tehničkim pregledima vozila na motorni pogon.

Ovo pokazuje da u zakonima kantona ima razlika i nedostataka u značajnim pitanjima, što ima negativnog odraza u ovoj važnoj oblasti za sigurnost građana.

Razlike koje već postoje u kantonalnim zakonima veoma je teško dosljedno ujednačiti i otklanje tih nedostataka moguće je samo donošenjem jedinstvenog zakona od strane Parlamenta Federacije Bosne i Hercegovine.

Međutim, donošenje federalnog zakona potrebno je ne samo zbog gore navedenih razloga, već i zbog činjenice što se oružje masovno koristi kod organizovanog kriminala, međukantonalnog kriminala, terorizma i suzbijanja trgovine drogom. Ovim zakonom bi se pravno na jedinstven način regulisala sva ta pitanja u ovoj oblasti, s tim što bi se na nivou Federacije uspostavio jedinstven registar izdatih odobrenja i oružnih listova za nabavljanje, nošenje i držanje oružja, a i druge potrebne evidencije (promet, proizvodnje oružja i municije i dr.) u Federaciji Bosne i Hercegovine. Ovaj registar bi bio od velike koristi na rješavanju pitanja koja se odnose na organizovani kriminal, kod kojeg trgovina oružjem ima značajnu ulogu, a posebno kod sprečavanja ilegalne trgovine oružjem. Obaveza uvođenja ovog registra proizilazi iz Direktive 91/477/EEZ i njenim izmjenama 2008/51/EC.

Takođe u državama u okruženju Zakonima o oružju regulisana i pitanja legalizacije oružja i dobrovoljna predaja dozvoljenog i zabranjenog oružja. To pitanje je neophodno regulisati i federalnim zakonom o oružju, jer se time stvaraju pravni uvjeti da građani predaju nadležnim organima sve vrste oružja koje posjeduju bez odobrenja.

Prema tome, iz gore navedenog proizilazi da postoji puno društveno opravdanje da se donese federalni zakon o nabavljanju, nošenju i držanju oružja.

### **III - OBRAZLOŽENJE PREDLOŽENIH PRAVNIH RJEŠENJA**

Nacrt zakona o nabavljanju, držanju i nošenju oružja i municije je sistematizovan u XIX poglavlja i svako poglavlje reguliše pojedino pitanje iz oblasti oružja i municije i na taj način sva ta poglavlja čine jednu jedinstvenu cijelinu u okviru koje su regulisana sva pitanja iz oblasti nabavke, držanja i nošenja oružja i municije u Federaciji.

Ovim zakonom su na jasan i precizan način podjeljene nadležnosti između Federacije i kantona i sva pitanja koja se odnose na nabavku, držanje i nošenje oružja i municije su u nadležnosti kantona osim pitanja koja osiguravaju jedinstvenu primjenu zakona na prostoru Federacije a koja su u nadležnosti Federacije i to: rješavanje po žalbama, davanje stručnih mišljenja o primjeni zakona i vođenje Centralne evidencije o oružju i municiji i evidencije o otisku oružja (mehanički trag). Time bi kantoni zadržali postojeću nadležnost koje su imali u okviru kantonalnih zakona.

U poglavlju I- Osnovne odredbe (čl. 1. do 6.), regulisana su pitanja koja se odnose na predmet i cilj zakona, izuzetke od primjene ovog zakona, značenje izraza i dr.

U poglavlju II- Pojam, vrste i kategorizacija oružja (čl. 7. do 12.). U ovom poglavlju utvrđene su definicije oružja i municije, oružje koje se ne smatra oružjem prema ovom zakonu, Podjela oružja, kategorizacija oružja, ograničenja. U ovom poglavlju je u cijelosti preuzeta kategorizacija i ograničenje oružja kako je to propisano u Direktivama vijeća Evrope.

U poglavlju III- Nabavljanje, držanje i nošenje oružja i municije i isprave o oružju (čl. 13. do 27.) U ovom poglavlju uređena su sljedeća pitanja i to: nadležnost za postupanje po ovom zakonu, izdavanje odobrenja i oružnog lista, nabavka oružja za fizička lica, nabavka oružja za pravna lica, važenje i oduzimanje odobrenja za nabavku oružja, izdavanje oružnog lista, izdavanje odobrenja za nabavku municije, izdavanje odobrenja za sakupljanje starog i trofejnog oružja, oružje sa obavezom prijavljivanja.

U poglavlju IV- Postupanje s oružjem i municijom (28. do 43.) U ovom poglavlju su regulisana sljedeća pitanja i to: Prodaja, predaja, zamjena i onesposobljavanje oružja i municije, postupanje sa oružjem i municijom i nošenje oružja i municije, čuvanje oružja i municije, predaja dotrajalog oružja, postupci sa oružjem i municijom u slučaju napuštanja mjesta prebivališta, rukovanje i upotreba oružja, davanje oružja na poslugu, provjera nošenja oružja i municije, postupanje u slučaju prestanka potrebe za držanje i nošenje oružja, gubitka ili krađe oružja i municije, nađenim oružjem, u slučaju smrti vlasnika oružja, i nasljeđenim oružjem i municijom.

U poglavlju V- Oduzimanje oružja, municije i isprava o oružju (čl. 44. do 50). U ovom poglavlju su regulisana sljedeća pitanja i to: oduzimanje oružja, municije i isprava o oružju, vandredni zdravstveni pregled, čuvanje, privremeno i postupci sa oduzetim oružjem, municijom i ispravama o oružju.

U poglavlju VI- Promet oružja i municije ( čl. 51. do 55.) regulisana su sljedeća pitanja i to: Uvjeti za obavljanje prometa oružja i municije, nabavka oružja i municije u svrhu prometa, obaveza pravnog lica i obrtnika kod prometa oružjem i municijom, oduzimanje, prestanak važenja odobrenja i prodaja oružja i municije na malo.

U poglavlju VII-Popravljanje i prepravljavanje oružja i municije (čl. 56. do 58.) su regulisana sljedeća pitanja i to: uvjeti za obavljanje djelatnosti za popravljavanje i prepravljavanje oružja, oružje koje može biti predmet popravljavanja i prepravljavanja, postupci sa oružjem primljenim na popravku ili prepravku.

U poglavlju VIII- Civilna strelišta (čl. 59. do 61.) su regulisana sljedeća pitanja i to: uvjeti za osnivanje civilnog strelišta, upotreba oružja na strelištu i nabavka oružja i municije za potrebe strelišta.

U poglavlju IX- Mehaniči trag oružja (član 62.) je regulisana obaveza svih lica koja posjeduju oružje kategorije B u Federaciji da dostave Federalnom ministarstvu radi unosa otiska u propisanu evidenciju.

U poglavlju X- Žalbe (član 63.) utvrđeno je pravo da se na sva rješenja koja donose kantonalna ministarstva može izjaviti žalba Federalnom ministarstvu.

U poglavlju XI- Nadzor nad primjenom ovog zakona (čl. 64. do 67.) regulisana su sljedeća pitanja i to: upravni nadzor, inspekcijski nadzor i ovlaštenja lica koja neposredno vrše nadzor.

U poglavlju XII- Stručna obuka (član 68.) regulisano je pitanje stručne obuke za lica koja se bave poslovima nabavke, držanja i nošenja oružja.

U poglavlju XIII- Evidencije (čl. 69. do 71.) je regulisano pitanje evidencija koje se vode po ovom zakonu.

U poglavlju XIV- Prijava nelegalnog oružja (član 72.) je regulisano pitanje prijave nelegalnog oružja u Federaciji

U poglavlju XV- Evropski oružni list (član 73.) regulisano je pitanje Evropskog oružnog lista čiji sadržaj i obaveza izdavanje proizilazi iz Direktiva Vijeća evrope.

U poglavlju XVI- Ovlaštenje za donošenje podzakonskih propisa (član 74.) navedeni su propisi koje po ovom zakonu treba da donese federalni ministar i federalni ministar zdravstva, te rok za njihovo donošenje.

U poglavlju XVII- Kaznene odredbe (čl. 75. do 81.) navedene su radnje koje predstavljaju krivično djelo i prekršaj po ovom zakonu.

U poglavlju XVIII- Troškovi i novčane kazne (čl. 82. do 83.) utvrđeno je koji troškovi i novčane kazne pripadaju kantonima odnosno Federaciji.

U poglavlju XIX- Prelazne i završne odredbe (čl. 84. do 89.)

#### **IV – FINANSIJSKA SREDSTVA**

Za provođenje ovog zakona u budžetu Federacije BiH i kantonalnim budžetima nije potrebno osigurati dodatna finansijska sredstva. Ukoliko budu potrebna novčana sredstva iz Budžeta Federacije odnosno kantona ta će se sredstva kroz pružanje usluga po ovom zakonu vratiti.